

Pohnpei Studies Reader **Mwoakilloa History**



Pohnpei State Department of Education

Preface

This reader was developed as the first series of the Pohnpei State Department of Education’s “Pohnpei Studies Reader” series in collaboration with NGO Pasifika Renaissance to enable Mwoakillese students to learn their history as part of the Pohnpei Studies curriculum. The production of this reader was funded by UNESCO’s Participation Programme, which was administered by the FSM Office of National Archives, Historic Preservation, and Culture.


We would like to thank Ms. Roster Lemuel (Pohnpei State Historic Preservation Office) for her translation, Rev. Dahker Peter, Ms. Monique Panaligan, Ms. Evelyn Joseph (Pacific Resources for Education and Learning), and Mr. Garry Scott LLB (Hons.) for proofreading, and Mwoakillese elders for contributing their knowledge on the island history to the Mwoakilloa oral tradition documentation project in 2002-2004 (Nagaoka and Hicks in prep.), from which stories in Sections 3 and 4 are taken (the narrators are credited in the footnotes).

References

- Carson, Mike T., 2014. *First Settlement of Remote Oceania: Earliest Sites in the Mariana Islands*. Springer: New York.
- Eilers, Anneliese, 1934. *Inseln um Ponape*. In Georg Thilenius (ed.), *Ergebnisse der Sudsee Expedition 1908-1910*, 2, B, 8. Hamburg: Friederichsen, De Gruyter.
- Nagaoka, T., and B. Hicks (eds.), in prep. *Oh Mehjwa: Histories, Tales, Chants, and Songs of Mwoakilloa Atoll, Micronesia*. Pohnpei Historic Preservation Office, Federated States of Micronesia.
- Weckler, Joseph E., 1949. *Land and Livelihood on Mokil, An Atoll in the Eastern Carolines*. Coordinated Investigation of Micronesian Anthropology, Part 1. Final Report, no. 25, unpublished manuscript. Los Angeles: University of Southern California.

Table of Contents

1. SAPIN MIHN MWOAKILLOA 1
 1.1. Keioun pwihn ma leldo nehn Pacific..... 1
 1.2. Kariaun pwihn ma leldo nehn Pacific..... 2
 2. KOAUN IN WEIOK MEHJ 4
 3. SIKESIK IN SAPIN MWOAKILLOA 9
 4. SIKESIK IN NAHMWARKI.....13
 4.1. Nahmwarki Lakaidak13
 4.2. Nahmwarki Lajahpwoa.....20
 4.3. Nahmwarki Woajeidipw20
 4.4. Nahmwarki Lajamoahj20
 4.5. Nahmwarki Sinipwoa24
 4.6. Nahmwarki Wahdakwa26
 4.7. Nahmwarki Lalawa26
 4.8. Nahmwarki Nohjua27
 4.9. Nahmwarki Lemjorij28
 4.10. Nahmwarki Ehperiam.....31
 4.11. Nahmwarki Mahk.....33
 4.12. Nahmwarki Jakaraiaj35
 4.13. Nahmwarki Aijak36
 4.14. Nahmwarki Pisa37
 4.15. Nahmwarki Poahl39
 4.16. Nahmwarki Jowel.....39
 4.17. Nahmwarki Oahkes45
 4.18. Nahmwarki Sahn Johnson.....47
 Image Credits49



Rehnke.

1. SAPIN MIHN MWOAKILLOA

Dahioau janjal jang *archaeology*,¹ *linguistics*² apel *DNA study*³ pwa mine pwihn in armaj riau jang Asia kijoudo nehn Pasific. Mwoakid riau wiawi wikipijoang anjoauoh wiawihda, jang pwihn armaj riau ma ahr mour, lal apel palwoararai oaujoang.


1.1. Keioun pwihn ma leldo nehn Pacific

Keioun pwihn ma kijoudo mijkoalkoal jang Southeast Asia lel Australia apel New Guinea mwohn johnpar 50,000 wijahpwiok. Anjoauo inenin mwolou, adanki *ice age*. Ioar ma kahrehda jed ijoan jang akpas. Doakoahn Malaysia apel Indonesia pasoang japwin Asia ioar wiahda japw oau ma adanki Sunda. Doakoahn New Guinea apel Australia wia japw koalik oau ioar adanki Sahul. Joh ahr mihn padahkiong ihr iren nehn jed a ihr kak oar kijoula nehn madol en jeddo nehn pwungen Sunda apel Sahul ki warahr warrok. Ihr jeila oaroh lel Solomon Islands, a pwen johkak dohjanggo pwa koalik nehn jed. Araiok ma minehla Melanesia arai kin lallin *Papuan languages*. Arai kin rapahki oar koldi mahn in nehn jed apel japw (doahr mahn alu, mahn sang, pwun apel mwumw) apel dol wehn japw nehn woallo. Arai wijahn koaujoan siksiko dirinwa mine nehn dol, a arai kin kalap kajaujili. Me wewehki pwihn oawe jipid, dapwa arai pwen peneineipwi. Arai kin doadoahki sakai wiada mihn doadoahk. Arai pwen mwosmwos, kilirai soal apel pisen moang pwirangrang. Kijehrai ioar wiahla *Australian aborigines*, a kijehrai mine Melanesia pasoahng araiok ma kijoudo mwuhr wiahla mihn Melanesia epwi wija.

¹ *Archaeology* kin raparapahki ia mwomwen mour in armaj ke da armaj kin wia mehj jang in jaripda dipwou in oh mehj nehn pwirej.

² *Linguistics* ioar kin sdoadihki lal. Jang in kajauwi lal in akpaspi, kak diarda pwa ia mwomwen lalpwi koaroanpene ke dohpijoang apel ia mwomwen lallin mehj aluhpijoang wiahla lallin akpaspi.

³ *DNA study* ioar kin sdoadihki *gene* ma kadaudok en nehn palwoaroan armaj jang di in mehj. Jang in *DNA* ma kihjang sihn armaj in mehj apel kajawi *DNA* kihjang pwihn in armaj akpas. Me ioar kajawihda wikipijoang in pwihn in armajok apel ahr mwoakid jang oh mehj.



Mwoakid in keioun pwihn ma leldo nehn Pacific.

1.2. Kariaun pwihn ma leldo nehn Pacific

Kariaun pwihn in armaj kijoudo nehn Pacific jang Taiwan mwohn johnpar 4,500 wijahpwiok, pwa sohn wijahu diral jang in wia mwoaswel in rais. Arai kijoula Philippines, Malaysia apel Indonesia, pel kijoula leloh Madagascar oh arai lel Melanesia mwohn johnpar 3,300 wijahpwiok. Oadoan arai lallo *Austronesian languages* ioar ma akpas ne aluhpijoang nehn Southeast Asia apel Pacific Islands. Arai inenin mai nehn modo apel jemen nehn japlahkjili. Arai mwoakid pispis apel dauli Solomon Islands koujoanla Vanuatu, New Caledonia, Fiji, Tonga apel Samoa, oh arai pel pwoaida mwehu in joangoan siahk oau ma pwa *Lapita culture* oaroh lella johnpar 2,500 wijahpwiok. Arai kin podok wehn jahpw ma doahr mwehng, koahp, wus, moai apel apwali mahn doahr pij, doahk apel jumwa. Ihr kin pel loakjid apel rik pwun, roikumw apel opup. Dir ahr koapwoahn doadoahk kapwpwi ihr wiada ma doahr jiloa wiawihda jang sakai apel pwun pel ainpwoahs wiawihdahjang pwirej. Arai koujoan koalik

joandi pohn oaroahr jang in epwi peneinei dauli epwiki. *Linguistics* apel *archaeology* kajalehda pwa mine wikipjoang in armaj laplap apel armaj mwahl jang in kadaudok arai. Mwuh arai mwoakidla Micronesia apel eastern Polynesia, a araiok ma minmine Melanesia pwoapwoauhdohmg pwihno ma sabin kijoudo. Doar kijehn pwihn in Lapita ioar wiahla mihn Pacific nehn Polynesia, Micronesia, apel epwi wija pohn oaroahr in Melanesia.

Mwohn johnpar 2,000 wijahpwiok, ihrok ma minmine Melanesia, ioar kijen kariauo pwihno kijoudo jang Melanesia, a pwen injang Southeast Solomon-Northern Vanuatu, kijoula eastern Micronesia, nehn pwungen Chuuk apel Kiribati. Sdoadi in *archaeology* ma wiawi Mwoakilloa kajalehda pwa armaj lela pohn doakoahu mwohn johnpar 1,700 wijahpwiok pel kak oar mwohwoa jang. Koaroan penehn arai lallal apel joupwi nehn pwungen mihn Mwoakilloa apel Pohnpei pwa dapwa mihn Mwoakilloa sabin kijoujang Pohnpei.

Mwoakilloa johpwa kalapwuk jang oh mehj a kin pwen pasoang epwi japw. Pwa epwi mwar in Pohnpei doahr Nehnau apel Lepen mihn Mwoakilloa doadoahki, kajalehda pwa manman in Pohnpei lella Mwoakilloa mehj. Mihn Mwoakilloa pel oaloahda dirin mwoakid jang mihn Mwahjel, oh ihr pel oaloda mwoakid jang mihn Pingelap apel Kiribati jang oh mehj. Siahk in Mwoakilloa mweumweuhla jang in ahr koahiok apel kapehl.

2. KOAUN IN WEIOK MEHJ

Lel anjoaukij mwerin oar melmel koalik oau koauwehla apel kajpidihla armaj nehn imwin 1,700 jamwa, mine woal laplap roahmen, Nehnau apel Lepen Kadem, kin koanda Mwoakilloa, doahroar Nahnmwarki apel Nahnken oahng Pohnpei.

Nehnau⁴ ma keioun koan apel jamwro. Ih kin pwupwupwoa⁵ nehn imwen enih oau, Roangepalarro, Koapinloang apel sakai

⁴ Nehnahu doahroar Nahnawa, ma kalmoauin mwar nehn palien Nahnmwarki Pohnpei. Nehnau ioar keiou laplap pohn Mwoakilloa. Nehnahu ioar udahn mwar en Nanmwarki in Mwoakilloa. Mwhur, mijinerihn Pohnpeipwi ioar wahdala mwarin Nahnmwarki pohn Mwoakilloa nehn imwin 1800 wijahpwiok.

joarwipwi mine pohn doakoahu. Nehnau ioar ma kin kapkapkihla sapin dodoldihn wehn suhkoa ke wehn japw apel mwingehn kamdipw.⁶ A mwerin mihn Mwoakilloa joauloangla, Nehnau johla kol manman in jamworo.

Lepen Kadem⁷ ioar keriaun koaun ma kin apwahpwali sohn doakoahu. Mwerin en Nehnahu kapkapkihla mwingehk, Lepen Kadem pwukoahki ong wei nehnehdihn mwinge apel kol koajoandi in iloak in Nehnahu. Kapisjou pel wiwai mwerin Nahmwaki Woajeidipw, Nehnahu kijang en Lepen Kadem manman in koaun. Ohkasau ioar keioun mwuhr in Lepen Kadem.

Mwerin oar melmel, mine peneinei koalik jiluh arai kounok ioar Lajahpwoa, Mwenjonhid apel Ohkasau. Anjoauo, mine loap riau Mwoakilloa, ma ihr kin pwa Poaidi apel Pahdak. Loappo Pahdak ioar pali mijoa oaloap mijen Padahk indihla Uhrek lella Koapinloang nehn Kahlap. Loappo Poaidi ioar pali kapi oaloap mijen pahdak lel indihla Mwadohn lella Mwoadoahdoa nehn Kahlap.

En Lajahpwoa peneinei injang Poaidi a en Ohkasau apel Mwenjoaunid jang Pahdak. Nehnau kin injang peneinie in Lajahpwoa a Lepen Kadem kin injang peneinei in Ohkasau. Mwar riau oawe kin kadoaudoau dih jang pahpahu ong nah jerimwein anjoauo.



Japi.

⁵ Mihn mehjjok kin doadoahki pwehl ke soahn ni ke pwoa wia pwuhpwhupwoa oroah kin kajauihda pwa dahkij pirin wiawi.


⁶ Mwokidoawe adanki mwungomwung ke mwoehla.

⁷ Lepen mwar in Pohnpei oau. Wewehn Kadem johpwa janjal a Kadem kakoar pel Katem, wija joarwi ke poad nehn Lelu, Kusai ma kariaun koaun in Kosrae Nankuh kin mine mehj. Nahnkuh doahroar Lepen Kadem pohn Mwoakilloa a Nahnken nehn Pohnpei ma kin apwapwali armaj ipen Nahnmwarki.


Nahmwarki (Nehnu) jang oh mwohn melmel koalikko.

	Ad	Mwei sapda	Mwei doarihdi	Kahrepen doarihdi mweio	Mwoakid kajamwpwal wiawi nehn mweio
1	Lakaidak	?	1770-1780?	Mwakohkohla pwa apwal in mwinge mwerin melmelo	Melmel koalik kahrehda mwakohko oh kajpidihla armaj.
2	Lajahpwoa	1770-1780?	1790-1800?	Moadohla mehdi	
3	Wahjeidipw	1790-1800?	1815?	Moadohla mehdi	Dapwa pwel koalikko Kahlap mwehula jang in jedo lel.
4	Lajamoahj	1815?	1820?	Nihn Sinipwoa jerimweinno ioar kojukdi	
5	Sinipwoa	1820?	1825?	Ah imwinsihsi ioar kojukdi ih	Emen pwa: sapin mihn wai leldo (Duperrey nehn 1824?).
6	Wahdakwa	1825?	1835?	Moadihla, mwur ah imwinsihsi kojukdi ih	Epwi pwa: sapin mihn wai leldo (Duperrey nehn 1824?).
7	Lalawa	1835?	1850	Joaloangla nehn jed	Sapin mihn wai minehdi pohn doakdoau. Lalawa apel woalin wai en joaloangla nehn jed.
8	Nohjua	1850	1853?	Ah imwinsihsi ioar kojukdi ih	Dir sohn dok roaj. Sahn pwili woal in wai jilmeno ma kojkojdi jang in emen woalin wai pisihdi mihn Mwoakilloa.
9	Lemjorij	1853?	1856?	Ah imwinsihsi ioar kojukdi ih	


10	Ehperiam (Abraham)	1856?	1873	Moadohla mehdi	Rongmwehu lella Mwoakilloa. Ohroj indihla Mwandohn oaroh mwuhr ihr pel pwurdahla Kahlap. Woalin wai men adanki Jack Smith mine Mwoakilloa.
11	Mahk (Mark)	1873	1879	Moadohla mehdi	Sapin sohn noas in oaring.
12	Jakaraiaj (Zacharias)	1879	1884?	Moadohla mehdi	Jakaraiaj marainla mwerin ah doadoahk pohn jip jounpar eijek.
13	Aijak (Isaac)	1884?	1890?	Moadohla mehdi	Mihn Sipein koldi doakoahn Carolines nehn 1885.
14	Pisa (Peter)	1890?	1902?	Moadohla mehdi	Skuhl in mijin Pohnpeie kijoula oakla Mwoakilloa. Wein Joahmen wiliandi wein Sipein nehn 1899.
15	Poahl (Paul)	1902?	1904	Moadohla mehdi	
16	Jowel (Joel)	1904?	1941	Moadohla mehdi	Melmel koalik nehn 1905. Doadoahk sapda Nauru 1911. Koaujoan sapda Danpei. Japan wiliandi Joahmen nehn 1914.
17	Oahkes (August)	1941	1957	Moadohla mehdi	Mahwin kariau. US Navy wiliandi wein Japan.
18	Sahn Johnson	1982	1990	Moadohla mehdi	Poahjoan Wein Mwoakilloa kokouda nehn 1987.



Kamwosmwasidi kadaudok en Lajahpwah peneinei (-----: pwoakda).



Kamwosmwsosidi kadaudok en Ohkasau ah peneinei.



Kamwosmwsosidi kadaudok en Mwenjoaunid ah peneinei.

3. SIKESIK IN SAPIN MWOAKILLOA⁸

Mehj, mehj, lihmen kin mine mijen Langmwahu, Uhrek. Anjoauro Uhrek mine, a Kahlap apel Mwandohn pe joh. Ih painikihla enihmen ma kin pwen mine nehn jed. Rehnnoau liho lijaianda noaisikihdi jerimweinmen. Eniho kin wijk mwingehdohng liho apel jeriho. Anjoauro ma jeriho ne kak kijoujili, liho pwuroang noaisikdi emen jerimwein.

Anjoauro ma jeri karoahmenno ne pel koalikla, ih idoak oang ah nohno pwa, “Ia joamoaien? Amwda pwen joh joamoai? Pwen kisaioar doari?”

⁸ Jang Masi Lorrin.

Liho japoang, “Eh, pwen kisaihoar doari.” Jerimwein karoahmenno johpwa kamehlele inahu, ih ken mwajahni ih. Ih oaloo sihpas irroang mwoassoau in. A ih johpwa moair, ken mwajmwajahni inahu. Joah kos, enihwa ne wijk mwingehdo. Mwerin ah kihdi mwingehk, ih dildahla ipen liho moairla. A mwohn ma eniho dildahla nehn ummwo, jerimweinno ne pwen doakoahng siho in a likkoauwo, piroahdi. Ih koldi mwoasso joujowi.

Injohrehn, eniho pwehng liho pwa ih en ken alu. Liho pwa, “Mwehu, pwa ngoan ken sapda inimla kenen jerihok mwinge.” Nehn en eniho pirin alu, ih pwehng liho en kioang ah rahnmwahu oang jerihok. Ih ken uhdahng alu, jerimweinno kapanggoar ih mijik, pwa pwen enihmen.

Eniho ken alu, a jerimweinno kahuj mwoasso ma ih piroahng in en eniho likkoauwo. Eniho wud pohn pik a jerimweinno kahuj ih nehn japw. Anjoauo ma eniho alalu oaroh koadiloak, a jerimweinno kakila oakila in sipin nihok. Eniho pel alu, ih pel kahuj. Jerimweinno oakkoar kahuj eniho oaroh lel Insipw.

Ih kerdi nehn jed alu oaroh lel in Pwiken Insipw, elik in Uhrek. Jerimweinno pwen kahujjoar eniho pwa en rong da eniho pirin pwa. Eniho indihla oaroh lel mijen wijahu, jerimweinno pwen kahujjoar ih oaroh lel ipen sakaioau. Eniho pwahla lalloau ih ken lujdihwe pwalpijoang jedwa ih duhdihla. A jerimweinno rongda en eniho lallo, doar ih pel pwahla lalwahr pel duhdihla nehn jeddo.

Jerimweinno duhdihlahr, eniho koadiloak. Ih kapangda pwa emen nahk pwen kakhahkahuj ih. Eniho pwa, “Oak oh. Kahpwil in oamw nohnohu.”

Jerimweinno pwa, “Pwa da?”

Eniho japoang, “Pwa ma ngoah kahjik rahnmwahuwihla inoammwo apel rioammwo, a koah ne pirin jaripdi ngoahi.”

Jerimweinno pwa, “Oak, joah mehdi pwa kisa pirin japhla ipen nohno ara.”

Eniho pwa, “Joah. Pwa koah ne kapangda ngoahi, doar ngoah ken inlajang jampah.” Doari, eniho aluhoar joang, pwehng nah jerimweinno pwa, “Kisa.”

Jerimweinno pwa, “Ia kisa en inla?” Eniho japoang, “Kisa inla wijahu ma ngoan pwehng koawoa.”

Anjoau ma ara alulah nehn japwo, jerio kapkapang doahr dirin wehn suhkoahk apel mwosmwos in suhkoa a ken uwa. Pwa eniho ioar ma jaripda pwello apel poadikidi mwehng in apel suhkoa ohroj. Enio kin oapihda mwumw jang nehn lam koalikko, pwa lam koaliki ioar kin dir mwumwin. A ioar wijahwa ih kin oapihda jang mwumw ih wahlang pahioau apel nah jeriok. Ara alu oaroh lel Lokpaj, Kahlap. (Wijahu koaroan oang imwen joarwihn akpaso.) Ih pwehng jerimweinno pwa, “Jaripda men.” A wijahu pik. Mwerin en jerimweinno jaripda pwarroau, eniho pwehng ih en inla wahdo soahn kardoap. Jerimweinno ken inla dapangdo soahn kardoap. Eniho pwehng jerimweinno pwa en wiahda wijahu en mwehu. Mwerin en jerimweinno wiahda wijahu, eniho padahkihoang ih lalpwi. Eniho, “Koa, kisa ken rahmwahula. Koah pwen lemlemehr lalkoa?”

Jerimweinno japoang, “Eh.”

Eniho pwa, “Widahli, koah inla lel wijahu ma ngoah pwehng koah, pwahla lallo ken kerda. A koah wahdo eu poaddo.” Anjoau ma jerimweinno wahdo poaddo, eniho pwa, “Akpas, koahn jaripdi ngoahi a koah poadokdi poadden pohn moangoaioa.”

Eniho apel jeriho joangpene, rahmwahula. Eniho ken doaudihla nehn lippwo, okidekida, kihpene poahk. Jerimweinno ken pwahinkihla eniho soahn kardoapkoa doari, ken jaripdi. Ih pwoakida poad in nihsik pas poadokdi pohn moangoan eniho, doar ih ken alu.

Ih daudahla pohn japw Pwiken Insipw, ih ken kijoudihla mijoahr. Ih pwokdihla mijoahr, ah nohnohu idoak, “Ia koah injang?”

A ih japoang, “Ngoah pidek. Ngoah kapang pwa ma joh mehki j peido wijahpwiok.”

Ah nohnohu pwa, “Indoa ken mwingehla.”

Mwerin ah mwungehla ih inla pwehng riah jerimwein koalikko pwa ara en jeila loakjid. Doar ara ken kerroang pohn warro ken jei.

Ara jeila oaroh lel mijen Jepwen Jilel ara pohdekdi. Jerimwein koalikko peidla ah ohu ken sapda opop. A ara ohwa indi oaroh wesda oh Mijenwiho. Jerimwein koalikko opopop jang oh inminjoang oaroh ne lel injawaj, pwen johpwa mwumw. Doar jerimwein sikisikko pwa, “Kidoahng ngoahi.”

Jerimwein koalikko pwa, “Widahli, ma koah opop oaroh, joh mwumw koah oapihda, ngoah kojukdi koah.”

Jerimwein sikisikko pwa, “Joah wia doahren, kidoa ngoan jong.” Doar jerimwein koalikko pwoakida nah ohu kioang min siksikko. Min siksik pwanah kadardihwehr a ohu, poad. Ara roahmen kanah opop jang oh inmijoang oaroh pwong. Ara pwanah koakoahk. A jerimwein sikisikko pwehng riah jerimwein koalikko pwa, “Kannah jipweldihwe kapang pwa dahkij nehn jedden.”

Jerimwein koalikko jipweldihlahr kapangda soahn ni, a ih pwa, “Oak, pwen jappwoau!” Doar ara oapihdado oaroh lel dawaj. Pwen ioar Kahlap. Jerimwein koalikko pwa, “Joapwoai.”

Jerimwein sikisikko pwa, “Joah, joapwoai pwa ngoah ma kidalda. Koah kidal pwa mine asa pahpa?”

Jerimwein koalikko pwa, “Ngoahi jehjoa.”

Jerimwein sikisikko pel pwa, “Ngoahi kidal. Pahpa, ngoah jaripdi ih.”

Jerimwein koalikko pwa, “Ngoahi ma jaripdi ih.” Jerimwein sikisikko pwa, “A ia wija koah jaripdi?” Doar jerimwein sikisikko ken ukila jerimwein koalikko wijahu ma ih jaripdi ara pahpahu, pwa ih kidal pwa jerimwein koalikko pwen likamwkihda pwa ih ioar jaripdi jamarahu. Ara aluoar lel wijahu ma jamarahu joajoardi, poadwa jerimwein sikisikko poadokdi ne koalik pel uhwa. Jerimwein sikisikko pwa, “Ioar wijahwa me pahpa joajoardi.”


Jerimwein koalikko pwa, “Wei, eh?”

Jerimwein sikisikko pwa, “Eh.” A jerimwein koalikko pel pwuroang pwa japwah ioar jappwo ma ara oapihda. Jerimwein sikisikko pwa, “Joah, jepwsa. Koah johkak kalahpwuk japwanki. Kisa koarōj pirin japwanki.” Ara akakmai a jerimwein sikisikko jipwella kapangda warrah warwa ne peila. Doar ara ken kahuj oaroh jipwella warwa ne wiahla japwoau. Japwo ioar Mwandohn.

Doar ara pohlikilikdahla oaroh lel Uhrek, ara pwehng ara nohnou pwa, “Kisai ken jeidahla Kahlap”. Ara nohno malenihi warpas pohn pikko, roakihda peidla nehn jeddo, wiahla warpas. Ara ken indadahla inarahwa kihdi oh wijahu ma jamarahu joarjoardi. Inarahwa inenin malau pwa mwinge dir oaroh, apel koapda wija ohroj. Doari, jerimweinkoa japwankihla japwkoa.

Mine kadehdehn sikesiko mihnmine lel rehnoawe. Mijen nihra koau ma ara oapihda Kahlap wiahda sakaioau ma kishai kin pwa Mijen Koau. Nehrahu wiahla wos roairoai oau ma kisai kin pwa

Wos Poangoak, sapjang Jepwenjilel lel Mwandohn ioar warrah warwa. *Joai pwoas rohrohwei.*



War.


4. SIKESIK IN NAHMWARKI

4.1. Nahmwarki Lakaidak (? – 1770/1780?)⁹

Mine memel koalik oau lel Mwoakilloa nehn pwungen 1770 lel 1780 kajpidihla sohn japwe lel armaj riejek limmen ke jilihjek. Poadpoad in Mwoakilloa mwohn memel koalikko jipid. Kawehwe oarsik in nahmwarki sapda mwohn oar memel koalikko anjoauo ma Lakaidak nahmwarki.

Nahmwarki Lakaidak kin mine likin Loangoajlehng pohn Kahlap. Anjoau ma ih kin pirin jeila loakjid, ih kin pwoakida warah warro wahdahla elik kihdi likin nohk. Doari, ih jinoakdihwe warro

⁹ Jang Boaz Poll apel Makodo Daniel.



Kopwoi in kahlek.

nehn jeddo ih doauda powoa jeila loakjid. Ih jeila Nihn Lakaidak Kapar, ihr pwa Nihn Lakaidak pwa ioar wijahwa ih kin loakjid, oapihda kehpwini koalik.

Ih jeila nehn wijahu in konkoan Loangoajlehng pohn Pwiki Lapilappo oh nehn madau. Wijahu ioar armaj kin ilahrek pwa ioar wijahwa kaparro mine. A wijahu poadpoad. Ma armaj kin kadarla ahr ohk, kin ngap weneijek lel pwirej. Epwi wija ngap ijihjek, ioar wijahpwiok ioar Nahmwarki Lakaidak kin oapi. Ih kin oapihda kehpwini lahpilap. Ma kehpwini sikisik ih oapihda, ih kin kejpwiwihla. Kehpwini koalikkoar doari ioar ih kin oapihda. Ih kin oapihdahr uwen ih kak kang ih wahdo, johkin dir.

Ih wahdo kehpwini doari ih umwunla mar. Marrok kin lahpilap. Ih kosohla oalop kehpwiniho kioang pohn oaloap marro, wiahda mwingehioau. Ih pel kioang oaloap kehpwiniho pohn luwen marro. Ih kangla ohroj, ih moad. Doar ih pel moahmoahmoahir oaroh, ih pel jeila wijahuoar.

Nahmwarki Lakaidak mine nah jerimweinmen. Oadoan nah jerimweinno ioar Lajahpwoa. Doar mine anjoaukij, mwumw sikisik pirin kin pwarda, ma anjoau in mwumw pwok, a Nahmwarki Lakaidak kin oaloa nah kopwoio wahla doakoahdi. Oadoan mehkijje, ihr kin pwa “loap.” Ih kin doakoahdi ih loapihdi¹⁰ pwa joh mehkij en pwarda likin mwumw. Me ohroj ma wiawi ke pwarda likin mwumw kin ohla.¹¹ A doari anjoauo, ma ne lel anjoau in ma mwummwok kin

¹⁰ ‘Loapihdi’ lalin mehj oang inepwihdi.

¹¹ Me wehwehki pwa jeri pel johkak noaisikdi. Lakaidak jehjoa pwa pahien Lajahpwoa pirin noaisik, doar ih wia wini in poaroahla joang ohroj en johkak pwarda likin mwumw.

pel pwarda, a pahien Lajahpwoahu lijaian, a Lajahpwoa johpwa pwehng Lakaidak.

Doari Lakaidak, ma ih pwen jehjoa pwa pahien Lajahpwoahu pwen lijaian, inla oaloo nah kopwoio inepwhihdi pwa joh mehkij en pwarda likin mwumw. Doari lel anjoau in loap, Nahmwarki Lakaidak inla poadokidi nah kopwoio inepwihdi a Lajapwoa johpwa pwehng ih pwa pahioahu lijaian.

Inla oaroh pahien Lajapwoahu noaisikkoar, mehdi, pel mehdi nah jerihwa. Doar Lajahpwoa ken injinjuedkihlahr wahdihla ah joaujoauwa ma pahioahu pwilihki nah jeriho mine loaloo, pwehng ah armajjok en jaripda eu lippwo Jokojkoa. Ihr ken jaripda lippwoau oaroh loal, piroakihoang rohp in loaloo. Oaroh doari, Lajahpwoa ken kerdioang nehn lippwo. Ih okudekda pwehng ihr en kihdihla pahioahu oaloap poah, loap moahun a nah jeriho loap mehing. Ih kajappijoang, ihr ken kihdihla pahioahu pwilihki nah jeriho. Doarliho apel jeriho ken minmine pohn poah, ihr ken kamwinge ih. Mehdiho ken pwen minmine, liho mine oaloap poah a jeriho mine oaloap poah. Ih maroau, ihr kihdihla pil kanimpilihla ih. Ih pwen okudekda ihr kanimpili ih. Ih mwakohko, ihr kahildihla mwinge nehn oawoa.

Doar ken doahdoahro oaroh inenin woaroai. Jeriho, liho ne inla oaroh masla. Masla inla oaroh doar ne moasoahdi. Oaroh doar ne roj, lihwa apel jerihwa ne sihdi oaroh doari ne pwen roj. Johnpar doapoa, no pwen joh, moalkoahrroar mine in kilin Lajahpwoa.

A ronggo indoa injang Kahlap indihdohng Lajahpwoa pwa, “Inoammwo noaisik noaisikihdi jerimweinmen.”

Ih kanah pwohrdahjang nehn lippwo pwehng ihr, nah armaj, “Kimwi pwoakido war. Kimwi pwoakido umwin wijikkok kioang pohn war idan jeila Uhrek. Kimwi pisipis pwoakida epwi koapwoa kioang loaloo oh karuwaro jeila Uhrek.”

Lakaidak apel Lajapwoa uhdahn mihn Poaidi. A Lajahpwoa inla Uhrek ma mine nehn Pahdak pwa ih en uhoang jamahu ih pwilihla mihn Pahdak ma ioar kadaudok in Mwenjoaunid apel Ohkasau.

Doar nah armajjok kanah pwururdahr anjoauo kanah rikirikdahr, kihdihoar warahrkoa, pwoakdihlajoaujoauwo powoa ken idaiddihla Uhrek. A Lajahpwoa ken lalloang ngenin nah jeriho pwa, “Inla kojukdi nihn mwahmwa jeriho.” Doar anjoauo ma ih

doaudahjang nehn lippwo, ih pwoakida nah kopwoio, ih ken kerdihla pohn pereuwo ken alu. [Doar lupwen nah kopwoio wiahla pwaloau pohn pereu jang oh Kahlap inla oaroh lel Uhrek, minmine oaroh lel rehnnoawe.]

Doar anjoauo ma ih alu, ih sapda winehni. Ih winehni inla oaroh lel likin Loangoajilehng, ih lokida. Jamahu kin mine likin Loangoajilehng. Ih lokida rahnmwahuwi jamahu a kulehijmen ken, “*Kulehij!*” Nah jeriho ne kulehijla. Nah jeriho pel pwuroang pwa, “*Kulehij!*”

Lajahpwoa rahnmwahuwi jamahu pwehng ih pwa, “Mwehu nihmw jerihen mohur, a noaio mehdi?”

Doar anjoauo ma ih dillahjang nehn imwen jamahu, a kulehijjo pel, “*Kulehij!*” Anjoauohr nihn jamahu jeriho sapda weiroakda. Weiroakda oaroh, Lajahpwoa alaluhla, jeriho mehdi.

A doar Lajahpwoa ken warahkihoar nah kopwoio pohn pereuwo ken winehnihoar allaludihla Uhrek. Ih lel Uhrek, jipweldahdo, soalohadi pohn Kahlap oaroh pwanah ros.

Joah kos, en Lajahpwoa winehni wiahda pwungilahr melmelloau in indoa, koauwehla Kahlap apel Mwandohn oaroh roj. Melmello pel pohkjang suhkoahn pohn Kahlap apel Mwandohn oaroh roj daundi pwelwa. Pwello indi oaroh joaloangla. Koadikoan dollo Loahmehj pwilihki kodikoan dollo Koapinloang, ioarroar mehkoa armaj pokpokon powoa. Joh suhkoahpas, joh moai, joh ni, joh kipar, joh mehkij. Joang ohroj peila oaroh roj.

Ihr ononohn oaroh roj melmello, luhwen nihpwi ma inla koahjekidi ioarroar luwoahdi. Nihpwihoar peido koahjekkoang in pwikiho Koapinloang apel Loahmehj, ioar mehwahr luwoahdi. Ioar ihr kang. Ihr kang nihok pel inla jarip nehn pwello mwehngkoa ma ne moasoahdi. Ihr ken rik me massok ioar ihr ken kangkang inla oaroh doar ne roj. Rojjoar roj kanahr mwinge. Da ihr en kang? Inpwong ihr ne sapda mehmehti.

Doari inpwong, mwahnkapw luhwoahdihok ma sihkei jeidihla Uhrek. Ihr jeidihla Imwinjouo sapda pirapoa mwinge in wijahu. Ihr dahur wehn ni sikisikpwi wahdahla Kahlap ihr kang.

Ihr Uhrek, ma pwen johpwa ohla Uhrek, pwanah injenmwahu, johpwa ohla suhkoa in powoa. Joang ohroj pwen mine. Doar ihr pwen mwinge injenmwahu. Ihr minminehjili Uhrek oaroh

indahla Imwin Jeuwo, mihn Kahlap ne pwen rikjang mwinge in wijahu oaroh ne jamwdihdo. Doari, Lajahpwoa pilda nah jounpeipwi, ioar Ohkasau koahun, pwehng arai pwa, “Kamwai aluwe mwajahni. Mwajahni mihn Kahlappok. Ma ihr indihdo, kamwai kojukdi. Mwajahni ihr.” Anjoauo Ohkasau ioar Lepen Kadem pwukoahki apwapwali armajok oang Nahmwarki ke Nehnau.

Anjoauo ma Ohkasau kin jeido wijik mwingedihlahng Lajahpwoa, mwehng joanggoawo, ih jeidihdo engdehng en kojukdi armajok ma loakjid, pwa ih en oaloahda mwumw ih wahdihlahng Lajahpwoa.

A mine woalmen, Jouwelpar, kin mine mijen Kasau. Anjoaukij Ohkasau jeidahdo kapangda Jouwelpar loakjid mijen Joawoaik. Jouwelpar kejipwihla ah ohu a inla okudekidi. Ih ildahla mwomwehda pwa ih moahir a poadokidi nah kopwoio. Ohkasau jeido, waidahdo pohn upwen Jouwelpar dokdakoahr, Jouwelpar sapworla. Ih doakoahr joh mehkij ih doakoahdi. Ohkasau wijda nah kopwoiwa kaula doauda pohn warahu jeila Uhrek. Ohkasau johkak kalwehdi Jouwelp(ar). A Jouwelpar mine mwumw ipoa, ioar Ohkasau engengdehng en kojukdi pwa ih en wahdihla en Jouwelpar mwummwok Uhrek.

Anjoaukij Ohkasau pel jeidahdo kin kapkapang Jouwelpar pwa ih ne johkakkoang pwa Jouwelpar inenin pisikan apel poahm sik. Doari Ohkasau ken pohpohle Jouwelpar oaroh kapangda Jouwelpar poadokidi nah kopwoiwa mijen poahrin jeddo oaroh doari indihla mijen maddo. Jouwelpar indihla oaroh lel in madauo, pohn sakaio, ih peiddihla ah ohu. Ih kin oapihda oarong lahpilap. Ih kin peiddihwe oapihdahdo a ih johpwa kapang Ohkasau indoa nihdda warahu likin Imwinpikko oakdahdo nehn japw.

Ohkasau oakdahdo nehn japw oaroh lel ipen Jouwelpar. Ih indihla uhda ipen nihn Jouwelpar kopwoio, dokdakoahkioar kopwoiwa Jouwelpar pasoa. Ioar ah kalwehdi Jouwelpar. Ih dokdakoahr Jouwelpar kupila, ih wijda nihn Jouwelpar kopwoiwa kijoudihwe pokihkioar Jouwelpar kojukdi. Ih rikida en Jouwelpar mwumwkoa jeidihla Uhrek. [Doar sakaio ma Jouwelpar sipesip powoa, ihr kin pwa Jouwelpar. Mine mijen Joawoaik jang oh mehj. Ihr johkin ukudda. Mine armaj inlahng pwoakida pwa ihr en inla koajok woahpkoa, ihr pwudongda oaroh ihr ken pel kihdi.]

Anjoauohr, ih pel jeidahla Kahlap oaroh pel jeidihdo kapangda Kierpwung koaroonoang Daun Koajir, mehlahn kol nehk. Ih jeila pwehng Kierpwung pwa, “Eh, rukidi. Duhdi nehn jed koah kapang mwumwkan pwa ngoan kajiroa.” Doar ih kajiroa mwumw indihla a Kierpwung ken duhdi kapang mwumw. Ih lel ipen Kierpwung, pokdakoahr Kierpwung mehdioang nehn nehkko. Ih dipoalla Kierpwung likin nehkwa. Ih oaloo mwumwkoa nehn weren Kierpwunggo, rikkoang nehn warahu oar doari, ih kapeila Kierpwung pwilihki weren Kierpwung warwa. Doari ih jeila Uhrek. [Sakaio ma Kierpwung kohl nehk, ihr kin kahdanki pwa Kierpwung. Pwikiho, ma kin ngalingal, ih pwen somwda. A ma pel lop, ih joah pwohd pwuhrla pwa ioar illoa in pwikiho.]

Mine woalin Jelwij men ma kin mine Kahlap anjoauo. Doari ih kin pwili pwhno ma kin jeidihla pirap mwinge Uhrek. Rehnnoau, Ohkasau jeidahdo kapangda woalin Jeluijjo, a ih ken kau kijoudahwe elik oaroh kijoudahla nehn mwoarmwoar en nohu, poapla. Ohkasau johkak kaujdi pwa ih jadahr. Doar ih ken indihdo indahla nehn Kahlap. Ih indahla oaroh ih pel pwurdihdo wijahwahr, ih jipwela ih mine likin imwo, okdeki meir. Ohkasau kanah inda oaroh ngapila poa rahpas, ah jehjoa pwa woal in Jelwijjo pwen pwoakida poah kioang pehn moange ken okidekdi ken jipwjipweloang. Anjoauo Ohkasau dokdihwe, woallo kihpjoang poah, doar kopwoio pardihla dokdihla pehn poah, johpwa lel ih, a poad nehn pwirejjo. Pwa woalmene kin kidal mwoakid oau ma mihn Jelwij kin pwa “dohnere.” Ma armaj peiki kopwoi ke mihn pei, ih kak doarohadi kihjang koapwoan peio.

Ohkasau pwen leme pwa woal in Jelwijjo ne poad, ih kanah idangdihla nah kopwoio oaroh soang nehn pwirejjo. A woalin Jelwijjo ne pwordahr lokilokpenen kaudahla elik. Anjoauo ih wij nah kopwoio, ih ne lel oh elik. A doar ih kijoudahlahr lel elik pwoakida sakai jilu. Anjoauo Ohkasau kauhj ih, ih kijou oaroh lujla nehn jeddo, a Ohkasau pel kahuj ih lujla nehn jeddo. Ara kana kokouhj poapdihla oaroh lel nehn madauo, ih pwoakida nah sakaikoa, ih laloang winehni. Doar ih peida, sakaiok wiahla pako jilmen kijoudohng Ohkasau. Ih doakoahr emen koauehla nehn pwoaroan mijoa, kaula minmenno. Anjoauo ma pako kajiluh kaula, Ohkasau ne lel wosso. Ih ken doaudahla pohn wosso, indahla.

Pel mine emen Ohkasau pel kojukdi pohn wossoau Nehn Koahpwepwe. Doar ioar ih sapda pokpok armaj, kojuk ihr mihn Kahlap.

Nehn anjoaupwiok, mine lihmen oadoa Pwunganginmwein kin pirap wehn japw Uhrek oaroh ih kojkojdi. Mine nah jerimweinmen oadoa Wahdakwa. Nihn Lajahpwoa jerimweinno ma adanki Woajeidipw pwoakla Wahdakwa oaroh mwuhr ih wiahla nahmwarkimen.

Nahmwarki Lakaidak pwili mehkihdi mwakohko. Dir mihn Kahlap mehkihdi mwakohko.



War joaroak.

4.2. *Nahmwarki Lajahpwoa (1770/1780? – 1790/1800?)*


Doar mwerin Nahmwarki Lakaidak mehdi, a ioar nah jerimweinno Lajahpwoa wud nahmwarkihla. Lajahpwoa ioar ma kapwurihpene ihr mihn Mwoakilloa. Anjoauo ma Lajahpwoa moadohla, ih kioang nah jerimweinno ma adanki Woajedidipw en wud nahmwarkila.

4.3. *Nahmwarki Woajedipw (1790/1800? – 1815?)*

Woajedipw ioar pwuroang pwehng mihn Mwoakilloa en kamwikelehda nehn pwello, kihjang sakai in nehn pwello, ededda, pwuroang kajpalihda.

Oau mwar in Woajedipw ioar Kanikin Sihlepenloang. Kaniki mwar in Pohnpei oau. Mine wijahn loakjid in kajar Mwoakilloa ma adanki Kanikin Sihlepenloang.

Ohkasau doadoahk oang Woajedipw wiwiwia pwukoahn Lepen Kadem. A pwa jang in kapisjou wiwiwiawihdo mwerin Woajedipw mehdi, Nahmwarki ke Nehnu kihjang manman en Lepen Kadem ioar kahrehda Lepen Kadem johla. Mweijnohnid jang Pahdak kin uhki Nahmwarki Woajedipw oaroin ah mwehu. Mwerin Woajedipw mehdi, nah jerimwein koalikko oadoa Lajamoahj ioar wud nahmwarki.



Lim.

4.4. *Nahmwarki Lajamoahj (1815? – 1820?)¹²*

Nahmwarki Lajamoahj nainki Langenmwein. A rien Lajamoahj adanki Sinipwoa, ioar ma nainiki Juhdakano.

A Langenmwein woalmen ma siksik palwahroa, roairoai, apel mwehu palwahroa. Mihn Mwoakilloa kin kahdanki pwa mehjahj.¹³

¹² Jang Boaz Poll, a Yudid Lemuel pel pwili jawaj.

Lihn Mwoakilloa kin mwehuki Langenmwein pwa riah jeripeinnok kin kalap kapwahasda ih. Ah nohnohu kin wiahda ah le, kioang moangoan marpas.¹⁴ Langenmwein kin indoa, riah jeripeinnok ne piroahkihdi rohp, uwen arai kajamwpwalki riarai woallo. Arai kin pahda rohp piroahkihdi pwa ih en alu powoa indahla nehn imwahu. Ma ih kin mwundi, arai sohpe ne pakid moange, kohmwihdi moange, kapwasihkihda wehn suhkoa in nehn moange, wehn id apel wehn roamoak. Ih mwehu pwowoa, karahdin. Ma ih kin alu oh elik, a koah mine mijoahr koah kak load pwohn ih. Ma ih wud elik inla, ihr load powahu, a ihr inla rikda pik in lipwen ehno, a wahdo kihdi nehn kioahrrok. Ihr kin pwa “pwohn Langenmwein.”

A nihn Sinipwoa woallo, Juhdakano, ih koalik paliwoaroa, koalik kapehdin, koalik dinin. Doar lihn Mwoakilloa kin mwehuki Langenmwein, a johkin mwehuki Juhdakano. Doari Juhdakano kin luwacki Langenmwein. Ih ken pwen luwacki Langenmwein doar ken raprapahki pwa dahkij ih en kadipoahki Langenmwein.

Oaroh ihr diarda pwa nehn kamdupw, Nahmwarki Lajamoahj kin pwen oaujoang ah wioapoa jang nahmwarki ohroj pwa ma anjoau in ma ihr kin umw oaroh loau ke okohmw, nahmwarki ohroj iriroakdo, johkin kak pukkoang mwingehk. Ihr kin iloaklahng nahr sohn nehnehk en nehkdi mwingehk. Anjoau ma ihr nehkdihoar doari, a ioar ihr kapwa mwinge. A Lajamoahj, ih kin wiahng nah jerihok, ihr kin pwen okohmmwoar ummwo, pein ih pwen inla dipoaljang me ma ih mwehuki nehn kamwdippwo, kioang nah jerihok. Sohn Mwoakilloa kin kapang, ihr ken joah pwungki, pwa udahn siak in Mwoakilloa jang mehj leldo rehnpiwai, anjoau in kamdupw, mwunge pirin nehnehpjoang paiahioang ohroj.

Pwa Juhdakano luwacki Langenmwein ih ken raprapahki dahkij ih en kadipoahkihda. Ih diarda pwa mihn Mwoakilloa lioassoang Nahmwarki Lajamoahj. Doar anjoauo, Juhdakano ken kapokonihpe ne mwahnkapw in Mwoakilloa pwehng ihr pwa ihr en

¹³ Mehjehj ioar lalin mehj oang armaj ma inenin lel apel paliwar mwehu.

¹⁴ Marpas joangoan mwummwoau ma mihn mehj kin pangalla pehn joau, kioang nehn le pwa pwohn oalngoan mwumw en mine nehn lehu pwa ihr en salipla ihr karahdinki.

ukdahla ih apel Langenmwein pwa ara en poadoar. Ihr ken ukdahla Langenmwein pwilihki Juhdakano likin Piken. Mine oapwoarroau mine wijahkijjo. Joh pik. Juhdakano ken pwehng ihr pwa ara en poadoar pohn oapwoarro.

Ara ken poadoar. A sapin, Juhdakano ken wahkihla pwa ma koalik palwahroa. Ih pwen lemehda, pwa uwen a luwakki Langinwein pwa jeripein in Mwoakilloa kin mwehuki a kin kiahki ih, pwa ara en poadoar pohn oapwoarro pwa ih en peiddi kojukdi Langenmwein pohn oapwoarro. A Langenmwein pispis mwoahroa. Ara pwanah pukpene, Langenmwein pohkkoar Juhdakano kupla. Juhdakano kupla, ohla mijen pwukkoa apel koapin poah. Ara poadoar pehn jiluh. Moangoan Juhdakano pwaldi mihn ah kupla doakoahdi peroauwok. Doari, kapwa koalikla en Juhdakano luwak.

Juhdakano injang oar wijahu, inla kapokonihpene mwahnkapw in Mwoakilloa ohroj. Ih pwehng ihr en inoaukihoang ih pwa ihr en kojukdi Langenmwein. Nihn Ohkasau, Mwenjoaunid apel Lajapwoa jeriok pwili mwoakiddoawe. Juhdakano pwehng mwahnakappwok pwa ihr en jeila kol nehk. Ihr ken kapweipweidi Langenmwein pwa ah pirienco en ukdihla ih pwa ara en pwili indihla loakjid. Ih pel pwehng ihr ohroj en onopda nahr kopwoi pwa ihr en doakoahki ke pokihki Langenmwein.

Doar inminjoang in rehnwa, ihr ken jei, a Langenmwein pwili. Ihr ken jeila, a Langenmwein jipwella ken pwahla nehn moange, “Amwda ke armaj ohroj wijik kopwoi?” Doar Langenmwein ne lemlemehki pwa dapwa mine mehkij ihr pirin wia.

Arai jeila lel Daun Likin Lerenno, sapkihda arai kol nehkko. Oadoan joangoan loakjid oawe ioar *kajar*. Armaj roahmen kin wa nehk koalihkoalikoau pohn pereuwo, ah mine karej in woal riau, oau mine oaloap nehkko, a oau mine oaloap. Anjoauo ma ara poadokdi nehkko, pwihn riauwo rahrahu, je kijoupene, pwa arain en karroahla mwumwok nehn nehkko. Woallo in mijen karejjo ma mine mijen nehkko adanki pohnaj. Ih ioar anahne keiou dahr pwa ih pirin kijou keiou roairoai, apel pispis.

Arai poaloahdi nehkko nehn dauo, a armajpwi pirin inla kahroahk mwumw oang nehn nekko. A Juhdakano pwehng Langenmwein, “Inla koah pohnaj. Koah pohnaj pwa koah dahr. Koan kahroahdo mwumwok.” Juhdakano pwehng Langenmwein en inla

pohnaj pwa arain en jaikidi ih jang likin jarkin. Doar Langenmwein ken kijoula pohnaj. Anjoauo ma Langenmwein kahkahroahdo mwummwok oang nehn nehkko, ih poki pohn jed, a ihr kijoupene pwa ihr en doakoa ih. Ih doakoahdi nah kopwoio kakla oh likin.

Doar ihr pel sapda loakjid. Ihr sohdihlahng ohwa pwurdihlakoa. Ihr pel wia doahro alaluhdihla oaroh lel Uhrek. A doar ne lop. Ihr kerda likin Imwin Lellepo, ihr wud elik indahla. Ihr jahik Langenmwein, johkak jahikdi pwa ih pisipis mwoahroa. Langenmwein ne pwen kidal doahr ahr mwoakmwoakiddo. Ih ne kidal pwa ihr engdehn in pokihdi ih ke kojukdi ih.

Doar ne lop, ihr ken indahla likin Uhrek. Juhdakano ken pwehng en Langenmwein pirienco, “Aluwe, kisai ne pwen johkakkoang pwa ih pisipis mwoahroa apel ih dahr, doar koan aluwe ahpwuhpwuhoang ih. Koah ahpwuhpwuhoang ih, koah koalloop in sikesikkoang a koldi ih oaroh masak. Anjoauo ma koah koldi ih oaroh soang, a koah pwa, “Kopo.”¹⁵ Kamai en kak kijoupene pokihdi ih.”

Doar ah pirienco ken inla ahpwuhpwuhoang Langenmwein allaluhdahdo, siksikesikkoang apel koldi oaroh masak. Ara allaluhdahdo oaroh lel Likinpwel ma mine Likin Lahngmwahu, dir lipwen lumkoruk. Langinmwein kupidihoar, aluhkihla likin ehn. Jerimweinno pwahla, “Kopo!” Anjoauohr, ihr kakpenehng Langenmwein. Langenmwein ken lemehda pwa ih en jinoakjang ah pirien in kilin, ih kakla likin kaula, a woalmen kol ipohn kimmoau. Anjoauo ma ih mwoakid pwa ih en kau, woallo kasoahkihoar ehn ipo in kimmo, lelloar oarmo koalikko in ehn, pwileila. Doar ih kijou, a johkak. Ihr kijoupenehng ih, poki oaroh mehdi.

Ihr oaloe ih, piroahdi, kioang ah pirien en warahkihdahla Kahlap. Juhdakano ken koahunda mwahnkapwkoa pwa ihr en kijoudahla Kahlap kojukdi Lajamoahj, jemen Langenmweinno. Doari ihr ken kijou. Ihr kijoudahla oaroh lel Kahlap, ihr inla pokihdi

¹⁵ “Kopo” lalloau mihn Mwoakilloa kin doadoahkki anjoau in kapisjou. Ma woalmen indoa pirin pei oang emen, ih pwa “kopo” pwa woallo en onopda. Armaj kin pwa “kopo” wehwehki pwa ‘koanupda!’

Lajamoahjwa kojukdi. Doar nah jeripeinnok inla jaripdi ih apel Langenmwein.

4.5. *Nahmwarki Sinipwoa (1820? – 1825?)*¹⁶

Mwerin arai kojukdi Lajamoahj apel Langenmwein, Sinipwoa nahmwarkihla, a johpwa pwoaida ah kaminminhpene sohn japwo. Mwerin johnparpwi ke mwosmwos jang, rien Langenmwein jeripeinnok pwehng pahioaraiok pwa arai en inla kojukdi Juhdakano apel Sinipwoa pwa ara kojukdi jamaraiok apel riaraiok.



*Sapin woalin
Mwoakilloa mihn wai
mahlenihda nehn 1824.*

Nihn Okasau jerimwein, Lekein, ma ih pwoakjang Lajamamoahj, sapkihda mwoakiddoawo kangoangoangihki nihn Ohkasau, Wahdakwa apel Mwenjoaunid jerimweinnok ma pel pwili Sinipwoa apel Juhdakano en kojukdi Lajamoahj apel Langinmwein.

Mine anjoaukij peneinei in Juhdakano ingkoadih arai najjoau likin Loahmehj, a pwihn oau jeijang Mwandohn, nihn Wahdakwa, Lemeiwud ioar koahun.

Doari Lemeiwud wahda nah pwihhno kijoudahdo pwehngdahdohng arai en onopda pwa arai pirin kapei kod. Kapei kod ummwoais in paksihkei in oh mehj oau ma ihr kin wia naj. Woalmen kin koldi kodpas, a emen kasoahki ih sakai. Minno ma kol koddo pirin doadoahkki en pokihkijang ke doakoahdihjang ih sakaiok.

Doari arai kioang Juhdakano en pallan Lemeiwud. Juhdakano kasoahki

¹⁶ Jang Boaz Poll.

apas nah sakai Lemeiwud. Ih kasoahla, johpwa eu sakai lel Lemeiwud. A Lemeiwud oaloo nah sakai wud kasoahki Juhdakano. Ih kasoahkihoar eu lel moangen Juhdakano, pwalpijoang. Kariau, ih pel kasoahki, Juhdakano doakoa sakaio johpwa lel. Kajiluh, ih kasoahla, Juhdakano pel doakoa lel pwalpijoang sakaio pel koauwehla kilin.

Juhdakano lioasla ken injinjuedla. Ih pukidi pwoakida sakaioau jipwella rien Lemeiwud jerimweinmen alaluhdo nehn roamoakko. Juhdakano oaloo sakaio kasoahkihoar lel armajjo. Nehn sikesikko pwa sakaio lelloar, pasoa armajjo mehdi. Doar Lemeiwud pwehng Juhdakano pwa, “Amwda koah ke wia doadoahkkoau doahren, koah ke kojukdi rioaihen? Koah joah jipwellahng mwerin pwa joah pwen mine pako?”

Doar mwerinno, Lemeiwud inla oaroh ken injinjuedla, ken nehn kapehd juedkihla. Ih ken minmine oaroh lemehda pwa ih en inla pokihdi Juhdakano. Ih kihpene mwahnakapwpwi doar arai ken inla a Juhdakano mine nehn umwaraio. Ih poki Juhdakano, Juhdakano mwoakid. Nehn sikesikko pwa Juhdakano uhda mwoakidjili, dihjekwa ohroj parjang ummwa, pwanah parpijoang. Doahr sihkei in ih pwa ma ih koalik.

Doar anjoauo ma ihr poki Juhdakano oaroh mehdi, nehn sikesikko pwa li in loappoawo kapangpangehla ih joang, a li in oaloap jipweldo jehjoa oaloap, pwa uwen koalik in ih.

Arai pel indihwe kojukdi Sinipwoa. Ihr poki ih oaroh ihr pwen pwa dapwa ih ne mehdi. Ihr ken indahla nehn Kahlap pel rapahki ia wija ioangehk mine pwa ihr en pel pokihdi. Ihr rapahki oaroh joh.

Arai japahldihdo, a Sinipwoa ne mohurda, karakla nehn dupwduppwo. Ih karakla oakla, a ih pwehng nah jerihok, Joana apel Lidipjoahr, “Kamwa johpwa pwahda ngoahi pwa ngoah joapwoan oaila.” Doar ih ken karakdahla nehn dupwduppwo oakla. Ihr kijoudahla rapahki ioangoan Sinipwoakoa Kahlap oaroh joh. Ihr japahldihdo, a ne joh nahmwarkihwa. Doar ihr ken idoakkoang Joana, “Ia oamw pahpah wa? Ia ih? Ia Sinipwoa?”


A Joana pwa, “Joh ih. Ih ne mehdi, kamai ne jaripdi.”

A ihr wud idoakkoang Lidipjoahr, a Lidipjoahr pwa, “Joh ih,” a ih ken dokla wijahu nehn dupwduppwo ma jamahu oakkoakkoak.

Ihr kijoula doarohadi Sinipwoa. Sinipwoa pwehngdohng Lidipjoahr, “Koawoa, joh joapwoamw. Japw ohroj jepwen Joana. A koawoa, joapwoamw imwin japw, imwin Jokojkoa, Likin Leren, apel Imwin Jehuo, pwa ma melmelda ke eng koalikda, en peila, pwa koah pwahda ngoahi.” Doar ihr poki Sinipwoa oaroh mehdi.

4.6. Nahmwarki Wahdakwa (1825? – 1835?)

Mwerin en Sinipwoa kojkojdi, riah jerimwein pwoakpwoakdo Wahdakawa ma pel pwili pwihno ma kojukdu riah jerimwein roahmeno, Lajamoahj apel Sinipwoa ioar wud nahmwarkihla. Ih nahmwarki roairoai jang johnpar eijek jamwa, ih wud kioang nah jerimwein koalik Lalawa en nahmwarki.



Jepjep in koau.

4.7. Nahmwarki Lalawa (1835? - 1850)¹⁷

Anjoauo ma Lalawa nahmwarki, dir jippin dok roaj kin kijoudo Mwoakilloa, a mine woal in waimen adanki James Striker ke mihn Mwoakilloa panginki Jim kerdi minminehla. Ih minmine Mwoakilloa oaroh johla dipahker, a jip joaroakpas kijoudo likin Poaidi oh in madau. Doari woal in Mwoakilloa roahmen ioar pwili woal in waio jeila in jippo. Emen ioar Nahmwarki Lalawa a emen ioar rien Alekjandira.

Arai kerda pohn wararai war ma doahrroar war in Pohnpei, pwa mwohn mihn Mwahjel padahkioang mihn Mwoakilloa poaloo war, war in Mwoakilloa doahrroar war in Pohnpei ma nauna ohng

¹⁷ Jang Moses Henry.

nan madau. Ihr jeila oaroh lel in jippo, arai oaloo nihrai dipahkerpwi apel dupukla dipahker oaroh dihrdir. Arai jeijang jippo jeido, pwa oh nehn madauo jippo mine. Arai jeijang jippo, jardahr engkij koalik oaroh. Jippo ken kijoula oaroh ohla warwa, pwuhrla woal in waiwa mehdi. Woal in Mwoakilloa roahmenkoa, Nahmwarki Lalawa ara, poap indoa oaroh lel pohn wos, pwuhrla mehdi.

A doari, anjoauo mine armaj in Mwoakilloahpwi kin kidal pwuhpwuhpwoa. Doari armajjok ken pwuhpwupwoa pwa amwda ke joh warwa, amwda ke johpwa japahldo. Arai pwuhpwupwoa oaroh diarda pwa warro ohla, woal in waiwa pwuhrla, woalkoa poapdo oaroh lel pohn wos pwuhrla mehdi. Ohroj arai mehdi.




Si, koau in ilahrek ma wiawihkihda ipon pwai.

4.8. Nahmwarki Nohjua (1850 – 1853?)

Jang in en Lalawa mehdi nehn jed kioang en Wahdakwa a imwinsihiok anjoau mwehu in kihjang a nahmwarki jang in en armaj johpwa injenmwahki en Wahdkwa pilda Lalawa, doar ihr leme pwa anjoau mwehu in pilda emen jang nehn oau peneinei sohrohr. Me ioar kahrehda pwihn oau jang en Ohksau apel Mwenjoanid peneinei kojukdi Wahdakwa apel nah jerimwein koalik roahmeno, Lemeiwud apel Jopwalap.

Mwerin pei oawe, Nohjua nihn nihn Mwenjoanid jerimwein koalk ma koun in peneinei ioar nahmwarkihla, pwa kakoar ah nohno nihn Nahmwarki Woajedipw. Nehn johnpar riau ke jilu, nihn Wahdakwa jerimweinnok pwilihki riari jerimweinpwi pwilih arai

kojukdi Nohjua apel epwi riah jerimwein siksikok. Nihn Wahdakwa jerimweinnohr koalik Lemjorij ma kounin mwoakiddoawe ioar wud nahmwarkihla.



Seu, mihn doalngoak wehn japw.

4.9. Nahmwarki Lemjorij (1853? – 1856?)¹⁸

Anjoauo ma Lemjorij Nahmwarki, pwihn in riarioau jang en Mwenjoaunid peneinei, oadoarai, jang keiou in koalik, Jakaraiaj (Zacharias), karoahmen Kamere, kajilmen Poahj (Boaz), kapahmen Mohsis (Moses), a kalimmen Poahl (Paul), inoaukihda pwa arai en inla kojukdi Nahmwarki Lemjorij, pwa Lemjorij ioar pwili kojukdi arai pahpau Nahmwarki Nojua.

Wolpwi jang en Ohkasau peneinei pwilihla pwihno. Mine woalin Mwajelmen adanki Lakapwuj ma pwili pwihnin Nahmwarkihn Mwajel Kapwua (Kabua) peila Mwoakilloa nehn 1856 pel pwili mwoakiddo. Riariho kadarla Poahj en inla suhwoang Kamere, pwa Kamere pwoakpwoaklahng peneineioawo. Poahj inla suhwoang Kamere a Kamere pwa ih jehpirin pwili, pwa mindoahr ma ih pwoakpwoaklang pwihhno? Ih kin mourjang pwihhno. A doar Poahj lioasla pwehng ih pwa, “Inpwonge ngoah pirin aluwe kojukdi koawoa, poaloahjang moangoamwen.”

Doari inpwongo, riariho inoauda oaroh doari, Mwenjohpwoa, nihn Ohkasau, pwili arai, ioar wujudapwoahin¹⁹ a pwehng arai,

¹⁸ Jang Boaz Poll.

¹⁹ “Wujudapwoa” ioar wia pwuhpwupwoa en kajauihda da ma pirin wiawi.

“Kisai mwekidda. Epwi en Lemjorij pwi hn Mwandohn ne jeila kahlek, a doari arai nen indahdo mahwinnoang kesai pwinggoawe.” Doari, mine jiloahpas, arai kihjang pohn jippok, Mwenjohpwoa ken pwoakida kioang Jakaraiaj, a Jakaraiaj japoangki pwa, “Ngoah jehjoa doadoahkki koapwoahn mihn paileng.”²⁰ Doari ih pel kioang Mohsis, Mohsis pel pwahla doahro, “Ngoah johkak doadoahkki koapwoahkijjen pwa ngoah jehjoa koapwoahn mihn paileng.” Doari anjoauo ma ih kihkihjili, a Poahj doaroahdi, arai ken kijou.

Arai kijoudihla mijoahr in Lokpaj, a Lemjorij okdekda kajappijoang likin ah najjo, nah jerimweinwa, ioar Pisa (Peter), mine oaloap poah a nah jeriepinno, Jehin (Jane), mine pohn oaloap. Arai mine pohn rohppoau. Ih padpadahkihoang ara doahr ujuhok. A ioar anjoauo arai no kijoudihla. Anjoauo arai kijou a pwoak nihrai kopwoiok a ngilen, “Pwik,” ma pokpok penehn nihrai kopwoiok, a arai rong.

Pisa, “A dahkij doahr ma ngilen pwik?” A ioar arai no kijoudihla. Ih pwen okudekida, Lakapwuj ken doaroahdioar ih, arai ohroj poki. Mine lihpwi kijoupenehng pwa arai en doaroa, johkak. Arai poki oaroh kojukdi.

Arai rapahki Madu (Matthew), rien Lemjorij, pwa pwi hnno nimen kojukdi ohroj riahk. A Madu no kapangoar arai kojukdi Lemjorij, ih ken kau. Ih kaula, Ilaija (Elijah) ma mine ewij in Lokpaj, oaloe ih oakihla. Ilaija jeweje hla Madu pwa en Madu pahpahu Wahdakwa pwoakpwoakdohng rien en Ilaija pahpahu. Doari arai kijoula idoakkoang Ilaija, “Joh armajmen kijoudahdo me?”

A Ilaija pwa, “Johpwa armaj men kijoudo me.” Doar arai ken rapahki a jehjoa pwa ih no oaloe Madu peidoang nehn lipwen marroau, pwainkihdi rohppoau.

Doari arai rapahkihoar joh, arai ken kijoudihla Mwandohn. Kijoudihla suhwoang Kamere jejeidahdo pohn maddo likin Jokojkoa. A Poahj, “Da koah pirin kijoudahdohng wia? Koah ne pwa koah

²⁰ “Paileng” lalin mehjoau wehwehki pwa ‘jang likin.’ Armaj ma kihda sikesikpasse pwa udan wehwehn lalkijje ioar ‘pah loang,’ pwa anjoau ma jip in waiok kapwehsen lingdo jang nehn jeddo, arai kin dinin pwardohjang pehn loange.


jehm pwili kamai, a ioar ngoah no pwehng koah pwa ngoah pirin indihwe poaloahjang moangoamwen.” A ih johpwa japoang.

Doari arai kijoudihla oaroh lel likin Kaipel, Mwandohn, arai kapangda Lemeiwud, rien Lemjorij, minmineo. Mine woalmen, ihr kin pwa kijehn Lahpwoa, ioar arai kioang en doaroahdi Lemeiwud, arai poki, kojukdi. A ih inla, anjoauo ma ih piklahng Lemeiwud, Lemeiwud doaroahdi nehn mwarmwarao, soahr indihdo, pirinnoar ken mehdi a woalwa, Lakapwuj, no pisipis koldo ih, “Kopo!” A Poahj kakihda nah jiloahu poaloa lel Lemeiwud kupila, kupidi arai poki oaroh.

Anjoauo arai pokpoki, Poahj pikwe a armajmen mwoakidjili. Poahj doardakoahr ih lo pwoakida, a armajjo pwa, “Ngei Kapar, Ngei Kapar, eh Ngehi Kapar, Ngei mehn Pinglap, Ngei Kapar!” Poahj lioasla, doakoahr ih sangla ih nehn soakisoak in kiparrok, soangoar soang. Ih mwoakiddoar, johkak weila. Doar ih engdehnggoar pislahr, ih ken kau sangdahwe elik nehn joaujoauok oakila.

Anjoau ma ih mine pohn joaujoauok ih rongla, “Mmm... mmm...” nehn kieppwok. Pwa ioar wijahwa ma armajjok kin kijoudahla oakila ma ihr rongda kojukoj armaj wiawi. Peneinei, riari, pwoapwoaud, wahda nihrai jerihkoa, oakila. Ioar Kapar oakoakoak wijahu, a pwihn in mahuwinno doaroahdi ih.

Dapwa anjoauo arai in indoa raprapahki Madu, a riah jerpein koalikko Rohsa (Rosa) poaki arain joah kojukdi Madu pwoadoar johla woalin ah peneinei en wia kanah mwinge. Ih kioang Poahj japwkij Kahlap pwa arain joah kojukdi riahu.



Ukin kahlek.

4.10. *Nahmwarki Ehperiam (1856? – 1873)*²¹

Mwerin ihr kojukdi Lemjorij, Ehperiam (Abraham) nahmwarkihla jang pwung penehn peneinei riahua ma kin uhpene Lajahpwoa apel Mwenjoaunid. Pwa ih noaisikdi nehn peneinei in Mwenjoahnid a ih pwoakpwoakla ipen Joana nihn Nahmwarki Sinipwoa en Lahjahpoa peneinei pwa en wud koaun peneineihn Sinipwoa.

Mwohn mihn Mwoakilloa jouloangla, Paolpahrok ioar oadoan Ehperiam. Nehn 1856, nihn Nahmwarkihn Mwahjel men adanki Kapwua pwihn oau peila lel Pingelap a epwi kijehrai lel Mwoakilloa. Anjoauao mihn Mwajellok pirin pwurla nehn japwaraio, Poalpoahrok pwilida arai. Ih kijkijoujili oaroh kijoula poadoarjili nehn wei in Mwajel. Anjoauo ma ih pirin ken kijoulahng nehn japwah, ih allaluhla pohn jip, a mine woal men in mijen karejjo ma rahnmwahuwi ih. Woalmenno ioar keiou in sihkei nehn Mwajel. Woallo rahnmwahuwi Poalpoahrok, oaloo poah, padikpene masak. Poalpoahrok okudekkoar padikpene poah. Ih pwa jesen sihda pohn ih. Uwen sihkei en ah padik poahn woallo, ih supwangdi jandin poah. Doar woallo pwahla, “*Jarkihpehin.*” Me wehwehki “Kadarla poahioa” in lalin Mwajel. Lihn Mwajelmen kasoahkihdi ih wini pwa ih en kihpijoang poah. Doari ihr ken kioang oadoan Poalpoahrok en wud Jarkihpehin.

Anjoauo ma Ehperiam sapin nahmwarkihla, mihn Mwoakilloa rosros. Ihr kin mine Mwandohn pwa jipin dok roajjok kin kalap peidi likin Mwandohn.

A Ehperiam kin injinjued anjoau ohroj pwa ih kidal pwa ma ihr pirin kapisjou, ihr pirin inla kojukdi ih. Doari ih kin pwen onnonop, loaloo kin pwen injinjued. Anjoaukijjo woalin wai men adanki Jehk Koakoaroas (Jack Smith) mine Mwoakilloa. Ih padahkioang Ehperiam joangpwi ihr en joah wia, ma doahr kojkoj armaj. Mwerin Jehk Koakoaroas kamarainla Ehperiam, ih pilda Ehperiam en wiahla john kaweid.

Rehnoau Ehperiam doadoadoahk Mwandohn, ih rongda ngilen pwihn in woal oau ne koarodohng ih. Ih doauda nehn kiparpas oakla nehn mojulín soahk. Woallok indoahr pwuroar uhdi pehn

²¹ Jang Makodo Daniel.

kiparo a doar koajkoajne ma arain kojukdi Ehperiam ke joah. Poahj pwungki arain pwi hnla kojukdi Ehperiam a riah woallo Mohsis pwahla pwa ih japwungki.

Anjoauo Jehk Koakoaroas pel pwehng Ehperiam, “Mihn waiok ne wahdo Koahsmen, ne lel Pohnpei. Ma koah joah mwehuki ihr en kojukdi koawoa, koah kijoula karwahdo Koahsso jang Pohnpei.” Ehperiam pwoakdahr pahoau douda pohn jipin dok roajpas ma minmine likin Mwoakilloa ara ken kijoudihla Pohnpei.

Anjoau ma Ehperiam wahla rongmwehu Mwoakilloa, ih padahkihoang mihn Mwoakilloa Koahs, ih pel pwehng ihr, “Kisai jeidahla koaujoan Kahlap. Kisai joah koaujoan Mwandohn pwa japw oawe siksik.”



Woa! insingda kilin nehn 1873.

Ioar anjoauo ma rongmwehu leldo Mwoakilloa. Ehperiam padahkihoang mihn Mwoakilloa Koahs. Ih pel pwehng ihr, Doari arai ken jeidahla Kahlap minehla. Joah kos, a johmwewu oau lel. Ihr ohroj pwudongda. Ihr ken lioasoangda Ehperiam. Ihr inla pwehng Ehperiam pwa ihr johpwa kamehlele ah Koahsso. Doar ihr pirin japahldihla Mwandohn. A nahmwarkiho ken kamarainihki ihr, sikesik oang ihr. Ioar anjoauo ma mihn Mwoakilloa ohroj sapda koaujoanla Kahlap allaluhdo oaroh lel rehnnoawe. Nahmwarki

Ehperiam pel pwehng ihr en johla mwoakiddoawe mwungomwung ke mwoehla ong nahmwarkihok, a ihr en wahlahng ahr mijineri en kapkapkihla. Doari jang anjoauo, ihr kin wahla sapin wehn suhkoa ipen wahnpoaroan.

4.11. *Nahmwarki Mahk (1873 – 1879)*²²

Anjoauo ma mihn waiok sapda kijoula Mwoakilloa, woal roahmen ioar doaudi Mwoakilloa nehn 1851. Emen woal ioar ma adanki Sahn (John McWilliams). Ih ioar emen in woallok ma mihn Mwoakilloa kapwuhrihla. Doar anjoauo ma arai mine Mwoakilloa, Sahn painkihla Jahles (Charles). Ioar wiahda Mahk (Mark). A rehn oau mihn Mwoakilloa kapwuhrihla Sahn nehn madauo, pwa emen woailin wai Luhk pisihki mihn Mwoakilloa pwa ih kin wia winehni.


A mihn Mwoakilloa kin inenin kajamwpwaliki jerihn wai. Ihr kin nimen nainiki jeri korohro. Anjoauo ma Mahk noaisikdi, Jakaraiaj pwehng Ehperiam, “Koldi jerihen. Johpwa kajpahlioang lihen pwa lihen li koasihwohmen. Ih nen kejpwiwihla jerihen oau rehn. Oaloo nihmw koah apwalihda. Johpwa mweidoahng lihen en kin pukkoang ke kol jerihien. Ioarroar jerihien en dihdi jang ah dihdiho, ah liho en johpwa kol ih.” Doar Ehperiam oaloo jeriho, ih ken apwalihda, pwa ih pirin rianki Jahles. A mihn Mwoakilloa inenin kajamwpwaliki jeri korohro anjoauo. Ihr kin pwa jerihn wahkoahl. Wahkoahl lalin mehjoauo wehwehki ‘wai.’ Koalikin arai kajampwalki jeriho, arai kin duhpki ih pilen pen.

Anjoauo ma Ehperiam no pirin ken mehdi, ih pwehng ihr mihn Mwoakilloa pwa ma ih mehdi, ihr en kioang Mahk en nahmwarki. Mihn Mwoakilloa pwungki. Ihr ken kajamwpwaliki jeriho. Doar mwerin en Ehperiam mehdi, ihr pilda Mahk en wud wiliandi ih Nahmwarki.

Wia oaring pohn Mwoakilloa sapda nehn mwein Nahmwarki Mahk. Ohroj kin oaupene wia oaring apel noasin oaring a Mahk ioar kin apwapwahli ong ihr doadoahk oawe. Orohj kak rik oaring nehn japw joah liplipil ong wia oaring ihr joah noaski a wilalihki koapwpoa.

²² Jang Boaz Poll, a Makodo Daniel pel pwili jawaj.

Doari anjoaukij, mihn Mwoakilloahpwi apel mihn Pohnpeipwi koadoadarla en wahla rongmwehu Mwoasiloak nehn 1874. Anjoauo, rongmwehu kahjik lel Mwoasiloak. Doari, arai pilpilloar, pilda Mohsis a pahioahu Mohsinia pwili jang nehn 1874. Ara wa nihra jerihmen oadoahwa Wilim (William). Arai jilimenno kijoula lel Pohnpei, a pwoapwoaud in Pohnpeioau, Opsinia apel Opsaia, apel nihra jeripeinmen Delihda (Delita), pel pwili kerda pohn jippo, kijoula Mwoasiloak wia doadoahk in mijineri. Arai kin pidpidekjili nehn doakoahn Mwoasiloak, padpadahkioang ihr doahr rongmwehu. Arai minmine Ruk oaroh doari Delihda apel Wilim ne nimen pwoapwoauda. Doar arai kapwoapwoaudihla ara nehn 1878.



Mijinerihn Pohnpeiok ma kijoula Mwoasiloak (Mohsis ma uhda loap jehjoa).

Anjoauo Nahmwarki Mahk apel Pisa kijoula Mwoasiloak. Jippo paj, arai pwili kijoudo Ngoasik. Kijoujang Ngoasik kijoudahdo Pohnpei, Nahmwarki Mahk johmwehuda, oaroh mehdi nehn pwungen Ngoasik a Pohnpei. Ih mehdihoar, ken molunehdi. Jippo johla kak kijou. Keiou in rehn arai pwen pehpehpei, a arai nimen idando Mahk Pohnpei. Arai karwaro pwa en kijoudo Pohnpei, a ma molun, arai johkak, pwa jippo pwen joaroakkoar doari. Lel kajilu in rehn, paliwoarwa ne naunahla. Doar kepdenno idoak iparai, “Amwai joaujoauen ne ohla. Joah mwehu kesai en ken kapwuhrihla?” Arai pwa, “Mwehu.” Arai kapwuhrihla nahmwarkihwa. Ih pwuhrla oaroh joah mwerin awahioau, awa riau, pwurroar ukengda. Ukengdahr, jippo ne kak joaroak kijoudo Pohnpei.

Sapin nehn mwein Nahmwarki Mahk, mijinerihn Pohnpeipwi padahkioang mwaren Pohnpei riau ma Wajahi apel Dauk pehn Nahmwarki ma pe joh pohn Mwoakilloa. Kamere ioar sapin Wajahi ma pirin wiliandi Mahk a Aijak (Isaac) ioar sapin Dauk anjoauo.

Kairoakdihn mwar in Pohnpei riau, Wajahi apel Dauk.

Da wiawi	Nahmwarki	Wajahi	Dauk
Mwar in Pohnpei riau sapda doadoahk	Mahk	Kamere	Aijak
Jakraias pwurla Mwoakilloa (nehn 1870 wijahpwiok)	Mahk	Jakaraiaj	Aijak
Mahk mehdi (1879)	Jakaraiaj	Aijak	Pisa
Jakraiaj mehdi (nehn 1884 wijahpwiok)	Aijak	Pisa	Ruhpin
Aijak mehdi (nehn 1890 wijahpwiok)	Pisa	Poahl	

4.12. Nahmwarki Jakaraiaj (1879 – 1884?)²³

Oh nehn anjoauo ma Jakaraiaj apel riahk kojukdi Nahmwarki Lemjorij pwilihki riahk, mwerin ekij, jip in dok roajpas kijoudo Mwoakilloa. Anjoauo armaj in pohn jippo pirapohla pahien

²³ Jang Boaz Poll.

Jakaraiaj adanki Lijiped (Elizabeth) idanla. Doar ih ken onohn oaroh mwerin johnpahrpwi, jip in dok roajpas pel kijoudo. Ih doauda powoa. Ih ken doauda pwili pwa ih en kijoula oaroh rapahki pwa ia pahioahu.

Ih ken pwilpwili jippo kin dok roaj, a ih ken pwen pwilpwilihoar doar ken jeila kin pwili ihr. Ih pwilpwili ihr anjoau woaroai lella Amerika. Ih lella Amerika, ih kerdi pwanah indahwe, suhwoang pahioahu alaluhdo. Ih kalelpoak liho, a liho pel kalelpoak ih. Amwda doahr ma pwen pahioah wa! Ih lalloahng liho, a pwen mehlel pwa ioar pahioauwa. Doari ih ken idando liho. Oaroahin johnpar eijek, ih raprapahki pahioahu, ih diarda. Ih idando Mwoakilloa.

Anjoauo, mihn Mwoakilloa ne pwoakida riah woalwa ma siksik jang ih, Kamere, kioang en apwali Mwoakilloa ma en Wajahi pehn Nahmwarki Mahk. Jakaraiaj kerdi kajiroahjang Kamere, pwehng ihr, “Pwije korod me, jehjoe pwa dahkij.” Jakraiaj wilindi Kamere wud Wajahi a Aijak wud Dauk. Jakaraiaj kamarainihda mihn Mwoakilloa. Ih pwehng mihn Mwoakilloa pwa ihr en joah kamehlele mihn waiok ma kijoudo minmine Mwoakilloa pwa ihr kijoudo kapwkapweipwei mihn Mwoakilloa.

Anjoauo ma Mahk mehid nehn jedo, nah jerimwein Jowel (Joel) pe siksik. Doar woal koalik pahmen jang nehn peneinei in nahmwarkin mwowoa pwi ma pilpildahjang nehn mihding in wei pwa arai en jeweje wei oaroh Jowel koalik koaikong ah pwukoahn nahmwarki. Woallo keiou sap ioar Jakraiaj jang nehn peneinei in Mwenjoanid. Anjoauo ma Jakraiaj sohda wiahla nahmwarki, Aijak wiahla Wajahi a Pisa wud Dauk.

Jakraiaj kadar pakair pwa armas en wia oaring jang nehn japwrai. Armajok kin noaski oaring ong woalin Mwoakilloapwi ma kin doadoahk ong koampanipwi.

4.13. Nahmwarki Aijak (1884? – 1890?)

Anjoauo ma Nahmwarki Jakraiaj mehdi, Aijak wud nahmwarkihla, Pisa wud sohda Wajahi a Ruhpin (Rupin) nihn nihn Wahdakwa jerimweinmen ioar wud Dauk. Nahmwarki Aijak kalahpwuk injang nehn peneinei in Ohkasau nahmwarkihla, pwa Mahk pwoakda ih. Ah wia peneinein Lajahpwoa sapda, pwa nehn

jemen Aijako, Lekein ma nihn Ohkasau, ma Nahmwarki Lajamoahj pwoakla. Aijak pel mine nehn peneinei in Lajamoahj jang in ah pwoakpwoakdohng arai. Lekein jong uhwoang woallok ma kojukdi Langenmwein nihn Lajamoahj jerimweinno. Ih kihpene pwihn oau en kojukdi Sinipwoa apel Juhdakano, woalkoa ma kojukdi Lajammoahl apel Langenmwein.



Umwen joarwihn nehn 1886.

4.14. Nahmwarki Pisa (1890 – 1902?)²⁴

Anjoauo ma Aijak mehdi, Pisa wud nahmwarkila, Poahl wud Wajahi a jaudi Ruhpin. Pisa ioar nihn nihn Nahmwarki Wahdakwa oh nihn Nahmwarki Lemjorij jerimweinwa.

Anjoauo ma Pisa wiahla nahmwarki, ih nimen pwuroang kajpahli suhkoahu pohn Jakaraij, Poahj, Mohsis, arai riarihoawo ma kojukdi jamahu, Lemjorij. En Pisa peneinei in Lokipajjok kaonop wia koapwoahn mahwin nehn naj koalikkoau mine elik in Jokojkoa. Ihr anahne pwuroang wiahda nihrai kowpoiok, pwa oh anjoau ma ihr sapin marainla, arai jeila wija ma adanki Pohn Rowwoho, arai ken

²⁴ Jang Joseph Apaisam, a Boaz Poll pel pwili jawaj.



*Suhkoan lep
"Mahnipihr."*

kejpwihla nihrai mihn pei ohroj. Ihr kin poaroahla najjo. Joh armaj kin indoa pwa ihr kin jinjiloo pwadoar armaj indoa kapangda. Ihr ken wiahda inenin dir kopwoi. Ihr kihpene kaonopdahng mahwin pwa arai pirin mahwinnoang mihn Pahdak.

Arai kaonopda oaroh mwehu. Arai pirin ken mwoakid, a lihmen, Juhle (Julie), pwahda.²⁵ Ih pwehng riaroho pwa arai en onopda pwa pwiwnno pirin indoa peioang arai. Doar anjoauo ma arai rongda, pwurroar arai ken kauhdi mwoakiddo.

A no pwen mweihn marainno. Anjoauo mihn Mwoakilloa no pwen oaloahda rongmwehu. A Poahj ne jounpadahk in joarwihla. Ih ne pel majikunla anjoauo. A pwen anjoauo ma ih rongda, ihr pwa ih pwanah roarroarroarki ah lioas. Ih pwa, "Amwda arai joah ken mwoakid? Mihnda arai pwa, a arai joah mwoakid?" Ih nimen kapang pwa mehleh arai kak wia.

A pwen Pisa johla nimen mahwin, doar ih pwuroang oaloo ah koapwoahn mahwinkoa wahdihla kerpwihla likin Jokojkoa. Doar,

²⁵ Mine li jilmen nehn sikesik ma arai mwoakid in kauhdi en Pisa koajoandi. Minno keiou ma mine nehn sikesik powoa Juhle, pahien nahmwarki Pisa pwehng en joah peioang mihn Pahdak pwa inahu Ajikinia jang Pahdak apel jamai Ajikaia woalin Mwahjel ma pel mineo. Karioau in sikesiko pwa Joana, nihn Sinipwoa jerpeino pel kijehn oar peneinein Lajahpwoa ma doahr Pisa, poaki Pisa en menlau kauhdi arai ononop in mahwino pwa ih pel painki mihn Pahdak. Pel oau kahrpoa ih poaki en kauhdi mahwin pwa jang in ah pwoakla Ehperiam apel Pohl jang en Mwenjoanuid peneinei in Pahdak. Kajilu in sikesiko pwa Jehra (Sera) kidalda mwoakiddoawe jang ipen pahioau, Lahrpwoa mihn Poaidi, ih inla pwehn mihn Padahk pwa ma ih pwoakpwoakla ipen Pohl. Ara mweipoajoang pwa rien Lahrpwoa, Lamahlang inenin lioasoangki ah mwoakiddo.

mehj ma koah kin inla wijahu, koah kak kapang pwa kopwoiok pwen minmine. A anjoaupwiai, kopwoikoa ne johla, pwa dapwa ne woaroaila. Doari anjoauo ma ihr kauhdi mwoakid, Pisa injinjuedla oaroh johla nimen mwinge oar ken johmwehuda. Mwohn ah mehdio, ih pwehng peneineiok pwa, “Ma ngoahi mehi, kamwai wahdo sakai mwangaingai wiahkihda oai joaujoauo. Mwomwen sakaipwiai ioar kajalehda doahr oai injinjued.” Doari anjoauo ma ih mehdi, ihr jaripidi ih Jokojkoa. Ioar mwoakid in kapisjou oawe ioar ken johla oaroh lel oh akpas.

4.15. Nahmwarki Poahl (1902? – 1904)

Poahl injang peneinei in Mwenjoanuid, nein Nojua apel rien Jakaraiaj, a pwoakpwoakdohng peneinei in Ohkasau. Nehn 1880 jamwa, mine woalin Pilipinmen Narcissus Santos ma mihmine Pohnpei kijohdo Mwoakilloa wia mijionari. Ih pwoakda nihn Poahl jerpeihnmen adanki Sele. Ih wiahda epwi kadaudokin Santos nehn weihn Kisi. Mwerin nahmnwarki Pisa mehdi, Poahl wud nahmwarki nehn mwein Joahmenno. Nihn Poahl mehjeni woal Orlando ioar wia mwahmwa koalik in President Bailey Olter.



Mwoakilloa nehn mwein Joahmenno (1910).



Mwoakilloa nehn mwein Joahmenno (1910).

4.16. *Nahmwarki Jowel (1904 – 1941)*²⁶

Jowel nihn Nahmarki Mahk apel Mahkpein jerimweinwahr doari ma noaisikdi nehn par 1872. Anjoauo ma Nahmwarki Poahl mehdi nehn mwein Joahmen, nihn Nahmwarki Mahk jerimwein wahr doari, Jowel ne koalik pilpilda nahmwarkila. A mwar in Pohnpei riau, Dauk apel Wajahi, kajohrla. Nehn mwein Joahmenno, pwukoahn koaun kariau wiawihda oh woal koapwoahpwoau Joani Ikin (Johnny Higgins) ioar oaloahdi. Nehn mwein Japahn (1914-1945), koapermen en Japahn kioang Jowel koun en wei a Joani Ikin kariaun koun apel johnkopwung. Anjoauo ma Joani Ikin mehdi pohn Mwoakilloa nehn 1939, nah jerimweinno Joahj (George) ioar pilpilda wud wiliandi jang in mihding in wei.

Melmel koalikko nehn 1905 koauwehla doakoahn likinnok kahrehda mwerin melmello johla mohur in pohn doakoahn Mwoakilloa, Pingelap, apel doakoahn likin Ruk. Nehn pahr 1910, mihn Joakoahj uhwoangda mihn Joahmenok, kojukdi koapinahn Joahmen. Mihn Joahmenok oaloe arai mihn Joakoahj ohroj kalipilihjang Joakoahj, kadarla Palau, pwanah kihjang ihr ohroj nehn wein Joakoahj.

Doar koapinahn Joahman kappwo adanki Kersting koajoanehdi oaloe mihn likinnok, kihdi pohn Joakoahj. Koapinahu pilda pwa mihn Mwoakilloa ioar en sapda oaloe japwarai, pwa ih painki lihn Mwoakilloahmen adanki Aspel. Mine umwen joarwihn Kahdlik oau Danipei anjoaukijjo, doari wijahu pwen mwakelkel pwa pahdirehk ne pwen kamwelehdha. A pel mine woahp oau arai kin pwa “Woahp in Koapina.” Arai kak minehro jipwjipwoallahng nehn jeddo kapang jippok kijkijoujili. Arai pel kak nihddihla warrai waren joaroakkok, arai jeila loakjid. Doari arai pilda mijoahr in Danipei poahm ioar jepwen mihn Mwoakilloa ohroj.²⁷ Mihn Mwoakilloa japwankihla jang oh Nanoahir indihla oaroh lel Diehkos.

Nehn mwein Joahmenno apel sapin mwein Japahnno lel 1920 jamwa, mihn Mwoakilloahpwi kijoula doadoahk Nauro. Ihr kin rik pwoahsped (*phosphate*). Nehn 1920, johmwehun wai oau lel Nauro.

²⁶ Jang Boaz Poll, a Moses Henry pwili jawaj.

²⁷ Poahm ioar wijahkij ma mweimweioang armaj joah lipilpil ma anahne.



Arai riari jilimen, Alpoas, Eneri, apel Melden (sapda loap jehjoa inla loap kidal), Nauro.



Arai riari jilimen, Lohrin, Julios, apel Esikar (sapda loap jehjoa inla loap kidal), Nauro.

Mihn Nauro pwilihkihla sohn doadoahkin mihn Maikronejia dihrdir pwi pwili mehkihdi.²⁸ Woal in Mwoakilloa eijek jilmen pwili mehdi: Pwoahpw Davd, Apiner Joahj, Jojuwa, Uriel Kiristoper, Oliper, Daniel Lebehn, Sahn Lebehn, Mohsis Moses, Alanjo Lipai, Kilion Lorrin, Normen Obed, Johsep Obed, apel Eliou Peter.

Nehn mwein Japahnno, nehn pwungen 1920 wijahpwiok, Jowel koajoanehdi kojonnedoau. Woal ma kin ukuhk sika en wen nehn pahr kapw. A ma ih joah wen, a ih en kihda mwehng lakpas limoau. Nahmwarki pwanah wiahda me pwa en koalkoahki araiok ma kin ukuhk sika. Doari epwi armajok kejpwiwihla sika. Ara lokkihla pwa arai pwen woal koalikipwi, a ken wenwenwen nehn pokon. Arai ken pel mehkkihda, johla ukuhk. Doar arai ioar wia sohn kasukuhl rehn ohroj, arai ioar ma kin koaunopda wen oaroh doari, arai wenla nehn pokon. Nahmwarki kin pel kak kihjang armajmen ma jakaun wai en jehpwili doadoahk in wei. Armaj ma koauwehla kojonnend in anjoaun mwumw pel kak oaoloahdi kaloklokin, ma ioar kihda mwehng limoau a pel kihda mwani oang wei.

Jang mwohn mwahwin kariau sapda, woalin Mwoakilloa pwili doadoahkkoang johnpein Japahn oang koaunopdahng mahwin Pohnpei. Nehn 1941, woalin Mwoakilloa dapwa pajek jamwa doadoahk in kojonnend Nanpil, Pohnpei. Jowel kin mine Mwahnd, a rong oh pwa ih johmwehuda doar ih ken jeidihdo imwen wini nehn Kolonia oaroh mehdi.

Doar anjoau ohr Joaulik (Soulik) ioar apwapwali arai. Joaulik, Paraihk (Frank), Alen (Allen) apel Dehpis (David) ioar wahdihdo rongo ong ihr apel wahla nehn arai oahpis in doadoahk. Ohroj mihn Mwoakilloa en koammoal. Doar ihr mweidoahng arai mihn Mwoakilloa koammoal rehnno. A ioar anjoauo ma pilihmasda idoak oang arai, “Kamai lemleme pwa inje pirin wiliandi nahmwarki?” Arai pwehng pilihmasda pwa, “Nihn Jowel jerimwein koalik roahmen, Ermen (Erman) apel Wiliem (William), mine Mwahjel. A Oahkes (August) ioar mine Mwoakilloa.” Doari pilijmasda kaminahng arai pwa Oahkes ioar en nahmwarki.

²⁸ Ioar kijehn *influenza* ke *Spanish Flu* ma ininen dirin armaj mehkihdi nehn jampah nehn 1918-1920.

A mehdiho wijikla Joakoahj rehnnohr, mihn Joakoahj pel kamdupw oaroh pwong. Inminjoangda, ihr idandahla mehdi Mwahnd en jaripidi. Anjoauo Nahmwarkihn U adanki Esmon (Etmont) kin pel mine Mwahnd. Arai pel wiahla kamdupw doaroahr siahk in Pohnpei oau rehnno. Anjoauo ma umwo okohmw, a arai wahla joaripidi. Mwerinno ihr japaldihdo Nanpil. Sohn doadoahkkok pwen mweimwei ong oar arai en koammoal inla pwili jaripdi arai nahmwarki, a doar pel pwurla doadoahk.

Doari ihr japahlla doadoahk oaroh doari. Pilijmahsda mweidoahng arai ma mine jip kimi kak pwili kijoula Mwoakilloa wahdahla ronggo. Joh jip kijou anjoauo. Kahrehda arai inla poakihda jipin loakjid koalik pas, doari kamai inla doawoang pohn jippo. A Joahj apel pahioau pwili. Ihr pel mihdingkihda pwa ma ihr kijou, a ohroj pirin likoau soalla, ke angkejep soal ke dahkij en mwoahr soal. Pwa ma ihr peidi likin paina in Mwoakilloa, a ihr ma jeidi en kidal pwa mehkij wiawi. Doar ioar ihr ohroj wia. Ihr pwen jeido jipweldohng oar pohn jippo, doar ihr ne pwen kidal pwa mehkij wiawi. Doari rehnno ihr pel kamdupw in mwerilik.



Nahmwarki Jowel apel Joahpi (Sophia) nehn mwein Japahn.



Umwen joarwihwo ma kokouda nehn 1939.

4.17. Nahmwarki Oahkes (1941 – 1957)²⁹

Oahkes (August) kajilmen in jerimwein ma noaisikdi oang Nahmwarki Jowel apel Joahpi (Sophia) nehn 1896. Ih kijoula doadoahk Nauru nehn 1920 jamwa apel Mwajel nehn mwein Japahnno. Nehn 1941, mwerin ahr wia mwerlik oang Jowel pohn Mwoakilloa, ioar anjoauo mihn Mwoakilloa mihtdingki inje pirin wiliandi nahmwarki. Ihr inenin pwungki nihn Jowel jerimwein Oahkes en nahmwarki, doar pel johpwa peidek oau ke uhwoang oau. A Nahmwarki Oahkes pel kamanmanla jang oahpis en Japahn. Doari Wahnpwoaroan Lepehn (Lebehn) kajarwihla Nahmwarki Oahkes nehn imwen joarwiho. Joahj pwen wiwia kariaun koun apel johnkopwung ong Oahkes lel imwin mwein Japahn.


Nehn mahwin kariau, woalin Mwoakilloa doadoahk ipen johnpein Japahn. Oau pwihn pwili wia jikohjo Nanpohnmal. Mine

²⁹ Jang Boaz Poll apel Yudid Lemuel.


anjoaukij jipsang in Amerka sangdo karoahk pakdang. Sohn doadoahkkok ohroj sangla rukla nehn pwohkinggo, a Madij Elwin kosla. Anjoauo ma ih lel pwohkinggo, pakdango kupdi wijahu, kojukdi ih. Ioarroar ih mihn Mwoakilloa wa ma mehdi nehn apwallo ma wiawi Pohnpei.

Nehn mahwinno, jip johla kak kijoula Mwoakilloa. Nehn Mahj 1944, jipsang in Amerka sangdo Mwoakilloa, kejpwihi pakdang waluh. Oau pakdang kupdi pwikipjoang mijen Poaidi, ioar kojukdi Jami Ben apel nah jerimwein Predirik, anjoauo ara ingkoaddi ara najjo. Doari armaj ohroj majpwehkada, jeijang Kahlap minehla Uhrek apel Mwandohn oaroh lel imwin mahwinno nehn 1945.

Doahroar nahmwarkihok mwohn ih, Oahkes kin wia sehrmen in wia kupwur in weiho oang mwoakidkan ma pirin wiawi nehn pohn doakoahu. Pwokon apel doadoahk in wehi kin wiawi ipoa Langarkapw nehn ah mweio.



Keioun pakdang ma peidekdi pohn Mwoakilloa nehn 1944.



Nahmwarki Oahkes pwilihki Commander Radford (pali meing) pohn USS Rochester nehn 1950.



Joahpi wia johnpadahk in sukuhl nehn 1947.

4.18. Nahmwarki Sahn Johnson (1982 – 1990)³⁰

Nahmwarki Sahn Johnson noaisikidi kahroamen in jerimwein oang Nahmwarki Oahkes apel Joana Joel nehn 1924, a ih pwoakipwoakila ipen Allen apel Naide Johnson. Ih sukuhlda Mwoakilloa nehn mwein Japahnno. Nehn mahwinno ih doadoahk ong johnpein Japahniook Madolenihmw. Mwerinoar mahwinno, ih kijoudihdo Pohnpei pwa en pwili sukuhl Ponape Teacher Training School ma keiou in pwihnno ih wiahla johnpadahk in sukuhlmen pohn doakoa Mwoakilloa nehn johnpar jipidpwi.

Nehn 1960 jamwa, ih pilpilda pwilihla Ponape District Legislature oaroin johnpar eijek wonou. Nehn ah mweio, Oahpis in Wein Mwoakilloa kokouda nehn 1974. Nehn sapda koan 1980, anjoauo ma laplap in siahk in wahu jang Pohnpei pwehng doakoahn likin kan en pilda arai Nahmwarki apel Nahnken en kak wia wiliopen arai doakoahk, Sahn pwuroang kamourda siahk ih wiahla Nahmwarki ah Dison Hedson wiahla Nahnken nehn 1982. Sahn wiahla Chief Magistrate nehn par 1986. Nehn ah wia Chief in Mwoakilloa, a doadoahk in jikohjohu kadioarehkdi, apel Poahjoan Wein Mwoakilloa kokouda nehn 1987. Ih kajarwih oang wahnporoan nehn 1981. Ih mehdi in 1990.



Kajarwihn Nahmwarki Sahn Johnson oang Chief Magistrate nehn 1986.

³⁰ Jang Deborah Rospel, a Bethwel Henry pel pwili jawaj

Image Credits

- Cover Google Earth imaginary.
- ii Eilers 1934:392, Figure 239.
- 2 Drafted by Nagaoka.
- 3 Drafted by Nagaoka, partly based on Carson 2014:2, Figure 1.1.
- 5 Eilers 1934:391, Figure 268.
- 8 Drafted by Nagaoka, based on Weckler1949:57, Table 3.
- 9 Drafted by Nagaoka, based on Weckler1949:57, Table 3.
- 9 Drafted by Nagaoka, based on Weckler1949:57, Table 3.
- 13 Eilers 1934:385, Figure 256.
- 14 Eilers 1934:390, Figures 254, 265 and 266.
- 19 Eilers 1934, Mokil, Plate 3.
- 20 Eilers 1934:387, Figures 259 and 260.
- 24 Duperrey 1826, Plate 57. (Duperrey, Louis I., 1826. *Voyage autour du monde, exécuté par ordre du Roi, sur la corvette de Sa Majesté, la Coquille, pendant les années 1822, 1823, 1824 et 1825, sous le Ministère de S. E. M. le Marquis de Clermont-Tonnerre, et publié sous les auspices de Son Excellence M. le Cte de Chabrol, Ministre de la Marine et des Colonies. Histoire du voyage. Atlas.* Paris: Huzard-Coucier.)
- 26 Eilers 1934: 441, Figure 301.
- 27 Eilers 1934:388, Figure 261.
- 28 Eilers 1934:443, Figure 306.
- 30 Eilers 1934:431, Figure 284.
- 32 Wawn, W.T., 1874. Amongst the Pacific Islands, 1870-74. M1971/294. Wellington, New Zealand, Alexander Turnbull Library. <https://natlib.govt.nz/records/23208214#>.
- 34 *Missionary Herald*, Jan 1879:40.
- 37 Mokil. From the album: Views in the Pacific Islands, 1886, Mokil, by Thomas Andrew. Te Papa (O.037896).
- 38 Eilers 1934:390, Figure 236.
- 39 Eilers 1934, Mokil, Plate 2.
- 40 Eilers 1934, Mokil, Plates 1 and 3.
- 42T The late Mr. Bethwel Henry's personal collection.
- 42B The late Mr. Welensen Julios' personal collection.
- 44 The late Ms. Marihne Henry's personal collection.

- 45 Naval Historical Center Collection [NHC04029]. Micronesan Seminar.
- 46 National Archives, USA Collection [NA02016]. Micronesan Seminar.
- 47T The late Ms. Nelimi Joel's peronal collection.
- 47B Naval Historical Center Collection [NHC04044]. Micronesan Seminar.
- 48 Anonymous, 1987. Mokil became Mwoakilloa, covenant effective. *The National Union*, 8(9):2. <https://comfsm.fm/library/digitallibrary/V8N91987.pdf>.
- 50 [https://commons.wikimedia.org/wiki/File:Crown,_Mokil,_Caroline_Islands_\(2853449567\).jpg](https://commons.wikimedia.org/wiki/File:Crown,_Mokil,_Caroline_Islands_(2853449567).jpg)
- Back Google Earth imaginary.



Pwoaipwoaiwa ma lihn mwoakilloa pwoaipwoaiki anjoauo ma jip in mijineri "Morning Star" peidi nehn imwin 1800 jamwa.

This reader was developed as the first series of the Pohnpei State Department of Education's "Pohnpei Studies Reader" series in collaboration with NGO Pasifika Renaissance to enable Mwoakillese students to learn their history as part of the Pohnpei Studies curriculum.



Stanly Etse, Director, Department of Education
Pressler Martin, Chief of Curriculum and Instructions
Evenger Waltu, Pohnpei Studies Specialist



Editorial supervision: Takuya Nagaoka, NGO
Pasifika Renaissance



Financial support: UNESCO's Participation
Programme

Pohnpei
Mwoakilloa
Pingelap
Sapwuahfik

Nukuoro

Kapingamarangi